

摛藻堂四庫全書薈要

集部

欽定四庫全書會要

集部

漢魏六朝百三家集卷一百十三

詳校官候選知縣臣吳甸華

欽定四庫全書
晉書要卷一萬九千七百八

集部

漢魏六朝百家集卷一百十三

明 張溥 輯

王褒集

詔

赦詔

民生而靜純懿之性本均感物而遷嗜欲之情斯起雖復雲鳥殊世文質異時莫不限以隄防示之禁令朕君

臨萬寓覆養黎元思振頽綱納之軌式比因人有犯與衆棄之所在羣官有憊過者咸聽首露莫不輕重畢陳纖毫無隱斯則風行草偃從化無違導德齊禮庶幾可致但上失其道有自來矣凌夷之弊反本無由宜加蕩滌與民更始可大赦天下

省徵發詔

民亦勞止則星動於天作事不時則石言於國故知為政欲靜靜在寧民為治欲安安在息役頃興造無度徵

發不已加以頻歲師旅農畝廢業去秋灾蝗年穀不登
民有散亡家空杼軸朕每旦恭已夕惕兢懷自今正調
以外無妄徵發庶時殷俗阜稱朕意焉

立通道觀詔

至道弘深混成無際體包空有理極幽玄但歧路既分
派源逾遠淳離朴散形氣斯乖遂使三墨八儒朱紫交
競九流七畧異說相騰道隱小成其來舊矣不有會歸
爭驅靡息今可立通道觀聖哲微言先賢典訓金科玉

篆秘蹟玄文所以濟養黎元扶成教義者並宜弘闡一
以貫之俾夫觀培塿者識嵩岱之崇崛守磧礲者悟渤
澥之泓澄不亦可乎

表

百寮請立皇太子表

臣聞游雷居震春方應守器之禮明兩作離少陽纂重
暉之業是以三善昭德載祀之祚克隆一人元良貞國
之基永固至于軒轅得姓高陽才子上嗣併賢前星虛

位魯國公斌親居元子屬當儲貳具寮仰則列辟式瞻
臣等參議請立為皇太子事隆監撫教資審諭問安寢
門視膳天幄

上祥瑞表

明王孝治岳瀆所以效靈至人澤及風雲以之懸感是
以若霧非霧天道叶至德之符似烟非烟觸石表嘉祥
之氣玄黃蕭索之輝丹紫輪囷之狀豈止唐帝沉璧氣
合金方姬后望河形如車蓋

萬物生象始乎算數天道運行基乎步術量有輕重平
以權衡音有清濁協乎律呂是以周發聽聲候春冬之
生殺師曠吹律知晉楚之衰亡數始黃鍾琯終仲呂還
宮變徵參天兩地三分損益累黍相乘四時發斂忽微
斯測皇帝治歷明時推元受命八音七始之奏五聲六
律之和斟酌繁簡分析節度推之以升解正之以權衡
稽之以古今覈之以經傳

啓

謝賚馬啟

邊城無草來自東南塞外饒沙經從西北漢時樂府偏愛權奇晉世桑門特憐神駿黃金作勒足度西河白玉為鐙方傳南國儻逢漢帝仍駕鼓車若值魏王應驚香氣

謝賚絹啟

似逐安車之徵如輕殿中之對臣善識山川應圖方丈

脫能臨水必不棄書

書

寄梁處士周弘讓書

嗣宗窮塗楊朱岐路征蓬長逝流水不歸舒慘殊方炎
涼異節木皮春厚桂樹冬榮想攝衛惟宜動靜多豫賢
兄入闕敬承欵曲猶依杜陵之水尚保池陽之田鐘跡
幽蹊銷聲窮谷何其愉樂幸甚幸甚弟昔因多疾亟覽
九仙之方晚涉世途常懷五嶽之舉同夫闕令物色異

人譬彼客卿服膺高士上經說道屢聽玄牝之談中藥
養神每烹丹沙之說頃年事邁盡容髮衰謝芸其黃矣
零落無時還念生涯繁憂總集視陰惕日猶趙孟之徂
年負杖行吟同劉琨之積慘河陽北臨空思鞏縣霸陵
南望還見長安所異書生之魂來依舊壤射聲之鬼無
恨他鄉白雲在天長離別矣會見之期邈無日矣援筆
攬紙龍鍾橫集

序

象經序

一曰天文以觀其象天日月星是也二曰地理以法其形地水火金木土是也三曰陰陽以順其本陽數為先本于天陰數為後本于地是也四曰四時以正其序東方之色青其餘三色例皆如之是也五曰筭數以通其變俯仰則為天地日月星變通則為水火金木土是也六曰律呂以宣其氣在子取未在午取丑是也七曰八卦以定其位至震取兌至離取坎是也八曰忠孝以惇

其教出則盡忠入則盡孝是也九曰君臣以事其禮不可以貴凌賤直而為曲不可以卑襲尊隱而無犯是也十曰文武以成其務武論七德文表四教是也十一曰禮義以制其則居上不驕為下盡敬進退有度可法是也十二曰觀德以考其行定而後求義而後取時而後言樂然後笑是也或升進以報德義取遷善或黜退以貶過事在懲惡或以沈審為貴正其瞻視或以徇齊為功明其糾察得失表于隆替在賤必申怠敬彰于勸沮

處尊思屈片言崇於拱璧一德踰於華袞

箴

皇太子箴

臣聞教化爰始詠歌不足政俗既移風雅斯變伏惟皇
明御宇功均造物改文為質斲彫成素皇太子游雷居
震明兩作離春夏千戈秋冬羽籥叔譽慙五稱之對師
曠降四馬之恩竊以太史官箴虞書所誠永樹芳烈丞
相所以垂文深覩安危太傅以之陳訓敢自斯義獻箴

云爾

天生蒸民司牧斯樹咸熙庶績式昭王度惠民垂統元良繼體麗止離暉惟機天啓令問令望聞詩聞禮從曰撫軍守曰監國秋坊通夢春宮養德桓榮獻書荀攸觀則元子為士齒卿命秩朝服寢門迴車作室正陽君位喬技父道臣子所崇忠孝為寶勿謂居尊禍福無門勿謂親賢王道無偏無為慮始無為事先損之又損全之亦全無往不復無平不陂美疢甘言鮮不為累則哲惟

難知人未易居室為善分陰無棄亡保其存危安其位
神聽不惑天媛斯忌文昌著于前星秬鬯由於守器庶
僚司歲敢告闕寺

銘

漏刻銘有序

竊以混元開闢天迴地旋歷象運行暑來寒往二分同
道烏靈正其昏夕兩至相遇表圭測其長短雖則晦朔
先後失於公羊之說次舍盈縮惑於丘明之傳至乎出

卯入酉黃道青綠季孟相推啟閉從序挈壺掌分數之
令太史陳立成之法軍將以之懸井壺郎以之趨奏百
王垂訓千祀餘烈者焉銘曰

玄儀西運逝水東流甘川浴日深壑藏舟測茲祕象是
曰神謀正震治厯下武惟周忽微以則積空成數圭表
弗差光陰斯赴箭水無絕靈虬長注徑寸日輪四分天
度器遵昔典景移新刻荆山既鐫昆吾且勒以福眉壽

百王垂則

四瀆祠碑銘

靈祠嶽立貝闕雲浮寂寥詭怪髮鬚神遊姬嬴分國河
渭合流桃花春水靈草孤洲潼鄉河曲汾陰睢壤亂流
不度龍門難上河魚送迎江妃來往水開通跡山臨高
掌智以藏徃神以知來榮光離合雲氣徘徊水仙遺操
津吏餘杯波息川后浪靖瞻臺

碑

上庸公陸騰勒功碑

在昔洞庭彭蠡三苗有遠竄之君太室陽城九卅無同
姓之國是知周衛設險所務非山川河岳作固所寶惟
休德至於三峽蹇產九折崢嶸高峰尋雲深谷無景秦
開漢閉雖阻荷戟之虞魏塞晉通終因東馬之利我大
周開闢宇宙混同文軌御六氣于天樞頓八紜于地絡
彭濮未恭邛笮不討外憑劍道之難內負銅梁之阨大
將軍上庸公仗國威靈奉辭伐罪長戟萬隊巨艦千舳
板楯酋豪斯渝君長厯稔逋寇累代稽誅廓清江源蕩

滌巴濮若夫荆門千里蜀置永安之宮巴水三迴吳阻
夷陵之縣巫峽使君之灘淪波洽沒建平督郵之道棧
徑威紓路阻巒阨途橫夷落檀強專險輕法侮史天子
爰詔有司公奉天討星言載塗指日遄邁冊授公大將
軍信卅刺史韓信召拜軍中致設壇之禮衛青出征臨
河聞後距之令夫鐘鼎大禮之器昭德必書金石不朽
之質庸勲斯樹某等乃建碑于某地敢作頌云

遐觀命氏眇求世祿龍圖紀河鴻漸于陸霸楚傳姓命

吳啟族君子篤生降靈惟岳朝陽擢彩荆山曜璞巴庸
自擅彭濮稱王南洎僰道西通夜郎內憑玉壘外阻銅
梁介視荒服斗絕邊疆赫赫南仲堂堂方叔天子命我
遐征越逐竇氏車騎去病冠軍封山刊石鐫銘刻勲遠
隔年代懸感風雲盛德必祀千載斯文

靈壇碑

悠悠五緯乃欽若於堯典茫茫九州是致功于禹跡猶
以天步懸遠隸首筭而弗窮地載遐荒章亥馳而未極

浩庭靄度吐納天和岷閭滄溟胞胎元一九靈之府神
液所以降祥五英之闕蓂華以之昭應推刼運之短長
校河源之廣狹谷永上書譬流風之不繫桓譚作論明
弱水之難航豈知迴天金簡惟傳上聖洞神玉策尚隔
中仙于時金風戒辰三光澄曜香雨乘空天花入室帝
乃升法座說玄言着覆洞微闡揚衆妙洪鐘應叩衢撙
待酌銘曰

鍾鳴上界梵響玄宮紫辰濯水青樹搖風八覺修行七

教弘通神機詣理秋毫坼空函席廣開法輪徐轉入神
精義談天勝辯逐境晦明逼機深淺或照盛業方圓雲
篆

又

雲橋啓館景曜開扉明庭朝禮仙館羽衣鶩履霄去鳬
鳥晨歸鍊石三轉燒丹七飛昆吾陶鑄丹陽鋈銑畫寫
龍文圖閒雕篆聲隨地氣調均天辯九宮方應萬靈稱

善

京師突厥寺碑

夫六合之內存乎方冊四天之下聞諸象教百億闍浮
塵沙筭而不盡三千日月世界數而無邊至於周星夕
墮漢宮宵夢身高梵世力減須彌應現十方分身百佛
上極天中下窮地際轉法輪於稔國留妙象於罽賓至
於善見神通瓶沙瑞相波斯鑄金優填雕木莫不歸依
等覺迴向佛乘棄形骸而入道捨國城而離俗突厥大
伊尼溫水汗夏后餘基惟天所置威加窮曠兵歷無革

小大當戶左右賢王麟膠角觸之弓就鵠羽射鶻之箭跨
葱嶺之首豪靡不從化踰天山之君長咸皆賓屬人敦
信契國寶親鄰太祖文皇帝道被寰中化覃無外提羣
品於萬福濟蒼生於六道大冢宰晉國公功高寅亮位
隆光輔命司空而度地監匠人而置臬帶三條之逸陌
面九市之通塵圖木緹錦雕楹磬密杳隨微雨自灑風
塵幡雜天花常調絲竹四禪大患淨界無毀六珠芬盡
法身常住銘曰

七華妙覺三空勝境意樹已彫心猿斯靜靈城偃色空
衣滅影索隱窮源振衣提領

善行寺碑

蓋聞在天成象羣星仰於北辰在地成形百川起於東
海是知璿璣盈縮並運天樞江漢所宗爭環地軸塵沙
日月同渤海之輪迴百億鐵圍等閻浮之數量章亥步
驟豈盡世界之邊隸首忽微寧窮劫海之筭象牛犄力
方十行之階梯免馬渡河譬三乘之等級定水壤須彌

之山智炬然金剛之刹敬表六和現沙門之進止永垂
四教示聲聞之律儀至於千疊火然鵠林變色四禪災
起鵠影傳輝羽林出使漢開濯龍之祀亲門傳譯晉虔
洛陽之拜

溫湯碑

原夫二儀開闢雷風以之通響五材運行水火因而並
用炎上作苦既麗純陽之德潤下作鹹且協凝陰之度
至於遷陵熱谿沉魚涌浪炎洲燒地穴鼠含煙火井飛

泉垂天遠扇焦源沸水衝流逆集甘州浴日跳波邁椒
丘之野湯谷揚濤激水疾龍門之箭故以地伏流黃神
泉愈疾云云

挺此溫谷驪岳之陰白磬上蔽丹砂下沉華清駐老飛
流瑩心谷神不死川德愈深

周太傅燕文公于謹墓碑

古者六等官人師傳崇其匡輔一命作牧侯伯摠其專
征南仲成薄伐之功吉甫作來歸之頌若乃仰叶宸曜

上屬台階錫之以彝器明之以車服隆名盛業太傅燕
國公其有焉西壁開其命緒東海傳其世祿父曾致平
法之科廷尉稱無冤之頌駟馬方駕高門繼軌公稟山
岳之上靈含風雲之秀氣雕良玉於廉削鍊貞金於鑿
塗於時王業繚構國步權輿太祖地雖二分功猶再駕
忠誠簡帝有志興王公運策帷帳叅謀幕府封齊定文
成之計間楚資曲逆之竒仲華訪輿地之圖林叔叅兵
車之右魏恭帝元年為大司寇正刑糾慝國無害馬之

倫翦暴誅姦民亡飲羊之俗三刺薦無簡之文兩造陳
禁邪之憲大周受命寶歷攸歸表高惠之功臣紀山河
之著命封燕公邑萬戶姬氏建國君奭始封昭王禮賢
郭隗開館又授太傅本官如先保定五年賜金石樂一
部公世為邊將少習兵書當敵制機臨戎應變增壘減
竈之圖題樹繁桑之畧軍中罷戰無廢雅歌壯士志驕
時觀投石及乎名高衛霍爵重韓彭錫邑增於鄭僑賜
乘同於魏絳丹節比司隸之貴緹騎將金吾之寵座闕

倡歌之娛堂無鐘鼓之奏辭功坐樹不伐征西之勲還
第角巾無競龍驤之賞銘曰

惟岳降神膺期命世量苞川敷道弘無濟昂宿協符佐
旌冥契匪躬諒直武節橫厲凶靖重險鐘鼎淪覆潛龍
勿用瞻烏在屋道贊上台功匡下瀆條教斯理彝倫載
睡懋官惟德明試以功既移上將實董元戎傳呼甚寵
徽草載隆居高能降處貴思冲寶命惟新王猷允塞爵
班異姓禮均同德林胡以南易州之北帝曰爾諧俾侯

燕國駿駿過隙滔滔逝川明哲詎寶館舍長捐立言不
沒遺愛在旃三河斥土駟馬開泉丹旋毀宗玄堂啓殯
寵贈虛加鸞和空引晏子悼齊隋武懷晉謂天蓋高如
何不愁

周太保尉遲綱墓碑

昔者王室藩屏周德謂之宗親列國諸侯異姓稱為伯
舅元勲懿德姬崇齊楚之封疏爵疇庸漢重韓吳之秩
司勲載其弘烈典冊備其徽章山甫式列辟之功紀迹

廟器莊叔匡成獻之難昭德彝鼎鴻名盛業公實兼焉
公命世挺生應期間出嵩華峻極降維嶽之上靈霜露
所均體中和之秀氣危松擢本且觀後彫之質貞桂挺
生便體冬華之秀是故以辰昴膺慶風雲玄感者焉公
柔順內凝英華外發斧藻仁義珪璋令範危勁之節冠
四序而踰秀堅貞之操經百鍊而不銷加以達門射法
遠中戰支養田箭神遙穿懸葉巧極將軍之伎精窮校
尉之官及年踰艾服任隆台袞甲第當衢傳呼啟路不

以寵貴驕人每以卑恭自牧易簣之言無忘寢療城郢
之志終於瞑目銘曰

珠角應期山廷表德出忠入孝自家刑國人物冠冕彝
章表則任屬屯警官聯極侍行部六條議班三吏逝水
詎停光陰不借速辭逆旅俄悲怛化旌舒夏練棺陳衛
幕北郭人稀西山景落三千不見九原誰作銘茲鼎鼐

永傳嵩霍

太子太保中都公陸逞碑銘

公本居三吳郡三吳縣丞相遜後也宋武匡定鐘鼎底
平涵洛公曾祖載寶贊軍謀及返旆南轍以司武畱守
赫連作亂見拘夏州以江右名家為中山太守地既鮮
虞途通靈壽呼沱易水仗武乘邊趙北燕南申威河外
祖營州使君長於戎馬稱雄朔漠南中都督猶纘奕世
之基西校國門無墜承家之業公職度深詳標尚閑遠
處衆撫謙居簡行敬風鑒外明潛機內敏建章門戶張
華立成原陵松柏虞延盡記昔處文房又居內職或傳

冰華時遊甲邸魏祖軍謀還豫南波之宴梁王師傅猶
對宣室之談出內優隆通籍榮寵升降榮步便頌宮禁
銘曰

淮海惟揚具區之藪水朝江漢星纏牛斗盛德遺風神
明厥後龍章八命鸞旛四牡賓階昔遇風月相思卿門
今別宿草何悲輪環不已零落無時永矣元伯長從此

辭

故陝州刺史馮章碑

其先陶唐氏之苗裔堯少子生而手有馮字因以為氏
俾侯於魯義等房心之地余與之廣事符河汾之邑使
君稟靈河嶽比德璵珩閨門和美譽聖開宗握文命氏
濁水北流秦關東徙巖險襟帶山河枕倚陸離組甲從
容青紫

祭文

為梁元帝祭王僧辯母貞敬太夫人文

維爾世基武子族懋陽元金相比映玉德齊溫既稱女

則兼循婦言書圖鏡覽辭章討論教貽俎豆訓及平原
楚發將兵孟軻成德盡忠資敬自家形國顯允其儀惟
民之則反命師旅既修我戎補茲哀職奄有龜蒙母由
子貴宣爾斯崇嘉命允集寵章既隆居高能降處貴思
冲慶資善始榮無令終崦嵫既夕蒹葭蚤秋奔駟難返
衝濤詎留背龍門而西顧過夏首而東浮越三宮之遐
嶽經三江之派流鬱鬱增嶺浮雲蔽虧澑澑江漢逝者
如斯銘旌故旆字毀遺碑即虛舟而談奠想徂魂之有

知嗚呼哀哉

文

周經藏願文

蓋聞九河疏迹策蘊靈丘四徹中繩書藏羣玉亦有青
丘紫府三皇刻石之文綠檢黃繩六甲靈飛之字豈若
如來祕藏譬彼明珠諸佛所師同夫淨鏡鹿苑四諦之
法尼園八犍之文香山巨力豈云能負以歲在昭陽龍
集天井奉為云云奉造一切經藏始乎生滅之教訖於

泥洹之說論議希有短偈長行責首銀函玄文玉匣陵
陽餌藥止觀仙字闕戶望氣裁受玄言未有龍樹利根
看題不遍斯陀淺行同座未聞盡天竺之音窮貝多之
葉灰分八國文徒罽賓石盡六銖書還大海仰願過去
神靈乘茲道力得無生忍具足威儀又願國祚遐長臣
民休慶四方內附萬福現前六趣怨親同登正覺

幼訓

陶士行曰昔大禹不妄尺璧而重寸陰文士何不誦書

武士何不馬射若乃亥冬修夜朱明永日肅其居處崇
其牆仞門無糅雜坐闕號呶以之求學則仲尼之門人
也以之為文則賈生之升堂也古者盤孟有銘几杖有
誠進退循焉俯仰觀焉文王之詩曰靡不有初鮮克有
終立身行道終始若一造次必於是君子之言歟儒家
則尊卑等差吉凶降殺君南面而臣北面天地義也鼎
俎竒而籩豆偶陰陽之義也道家則墮支體黜聰明棄
義絕仁離形去智釋氏之義見苦斷習證滅循道明因

辨果偶凡成聖斯雖為教等差而義歸汲引吾始乎幼學及於知命既崇周孔之教兼循老釋之談江左以來斯業不墜汝能修之吾之志也

樂府

關山篇

從軍出龍阪驅馬度關山
關山恒掩藹高峯白雲外遙
望秦川水千里長如帶
好勇自秦中意氣多豪雄
少年便習戰十四已從戎
遼水深難渡榆關斷未通

從軍行二首

兵書久閑習征戰數曾經講戎平樂觀學戲一作覽劍羽林

亭西征度疎勒東驅出井徑牧馬濱長渭營軍毒上涇
平雲如陣色半月類城形羽書封信璽詔使動流星對
岸流沙白綠河柳色青將幕恒臨斗旌門常背邢勲封
瀚海石功勒燕然銘兵勢因麾下軍圖送掖庭誰憐下
玉筋向暮掩金屏

黃河流水急驄馬遠征人谷望河陽縣橋渡小平津年

少多遊俠結客好輕身代風愁櫨馬胡霜宜角筋羽書
勞警急邊鞍倦苦辛康居因漢使盧龍稱魏臣荒戍唯
看柳邊城不識春男兒重意氣無為羞賤貧

長安有狹邪行

威一作紂狹邪道車騎動相喧博徒稱劇孟遊俠號王
遙

孫勢傾魏侯府交盡翟公門路邪勞夾轂塗難倦折轍
日斜宣曲觀春還御宿園塗歌楊柳曲巷飲榴花樽獨

有遊梁倦客一作還守孝文園

飲馬長城窟

北走長安道征騎每經過戰垣臨八陣旌門對兩和毛
兵戍隴北飲馬傍城阿雪深無復道冰合不生波塵飛
連陣聚沙平騎跡多昏昏壠城月耿耿霧中河羽林猶
角觝將軍尚雅歌臨戎常拔劒蒙險屢提戈秋風鳴馬
首薄暮欲如何

輕舉篇

天地能長久神仙壽不窮白玉東華檢方諸西岳童俄

瞻少海北暫別扶桑東俯觀雲似蓋低望月如弓看基
城邑改辭家墟巷空流珠餘舊竈種杏發新叢酒釀瀛
洲玉劍鑄昆吾銅誰能攬六博還當訪井公

凌雲臺

高臺懸百尺中夕殊未窮北臨酸棗寺西眺明光宮城
傍抵雙府林裏對相風書題鹿盧榜觀寫飛廉銅旗開
神女電梁映美人虹虞捐濫天寵鄭督特懷忠莊生垂
翠釣昭儀拒一作鬪熊馳輪有盈缺人道亦汙隆還念

西陵舞非復鄴城中

出塞

一作塞
下曲

飛蓬似征客千里自長驅
塞禽唯有鴈關樹但生榆
背山看故疊繫馬識餘蒲還
因麾下騎來送月支圖

入塞

戍久風塵色勲多意氣豪
建章樓閣迥長安陵樹高度
冰傷馬骨經寒墜節旄
施行當見天子無假用錢刀

關山月

關山夜月明秋色照孤城影虧一作半形同漢陣輪滿一作全影逐胡兵天寒光轉白風多暈欲生寄言亭上吏遊客解雞鳴

長安道

槐衢回北第馳道度西宮樹陰連袖色塵影雜衣風採桑逢五馬停車對兩童喧喧許使座鐘鳴賓未窮

陌上桑

人傳陌上桑未曉已含光重重相蔭映軟弱自芬芳秋

胡始倚馬羅敷未滿筐春蠶朝已老安得久彷徨

明君詞

蘭殿辭新寵椒房餘故情鴻飛漸南陸馬首倦西征寄
書參漢使銜涕望秦城唯餘馬上曲猶作出關聲

遊俠篇

英華作
俠客行

京洛出名謳豪俠競交遊河南期四姓關西謁五侯鬪
雞橫大道走馬出長楸桑陰徙將夕槐路轉淹留

古曲

一作
雜曲

青樓臨大道遊俠盡一作任淹留陳王金被馬秦女桂為
鈞馳輪洛城巷鬪雞南陌頭薄暮風塵起聊為清夜遊

高句麗六言

蕭蕭易水生波燕趙佳人自多傾盃覆盃漼漼垂手奮
袖婆娑不惜黃金用盡只畏白日蹉跎

燕歌行七言

初春麗景一作鶯欲嬌桃花流水沒河橋薔薇花間百
日

重葉楊柳拂地數千條隴西將軍號都護樓蘭校尉稱

嫖姚自從昔別春燕分經年一去不相聞無復漢地關

山月

一作長
安月

唯有莫北薊城雲淮南桂中明月影流黃

機上織成文充國行軍屢築營陽史討虜臨平城城下

風多能却陣沙中雪淺詎停兵屬國小婦猶年少羽林

輕騎數逆行遙聞陌頭採桑曲猶勝邊笳胡笳聲胡笳

向暮使人泣長望

一作還使

閨中空佇立桃花落地杏花舒

桐生井底寒葉疎試為來看上林鴈應有遙寄隴頭書

日出東南隅行

以下雜言

曉星西北沒朝日東南隅陽窓臨玉女蓮帳照金鋪鳳
樓稱獨立絕世良所無鏡懸四龍網枕畫七星圖銀鏤
明光帶金地織成襦調弦大垂手歌曲鳳將雛採桑三
市路賣酒七條衢道逢五馬客夾轂來相趨將軍多事
勢夫聳好形模高箱照雲母壯馬飾當廬單衣火浣布
利劍水精珠自知心所愛仕宦執金吾飛甍彫翡翠玉臺
作翠繡桷畫屠蘇銀燭附彈映雞羽黃金步搖動襜褕
兄弟五日時來歸高車竟道生光輝名唱兩行堂上起

鴛鴦七十階前飛少年任俠輕年月珠丸出彈遂難追

牆上難為趨

昔稱梁孟子兼聞魯孔丘訪政聊為述問陳豈相諉末
代多僥倖卿相盡經由臺郎百金價台司千萬求當朝
少直筆趨代皆曲鉤廷尉十年不得調將軍百戰未封
侯夜伏擁門作常伯自有葡萄得涼州白璧求善價明
珠難暗投高墻不可踐井水自難浮風胡有年歲鋏利
此吳鉤

詩

九日從駕 以下五言

黃山獵地廣青門
官路長律改三秋
節氣應九鍾霜曙
影初分地暗色始成
光高旆長楸坂緹幕
杏間堂射馬垂雙帶
豐貂佩兩璜苑寒梨
樹紫山秋菊葉黃華
露霏冷輕飈颯涼終慚屬車對空假侍中郎

入朝守門開

梁簡文有守
東華門開詩

鳳池一作直城通複道嚴駕早凌晨鐵符行驚曙銀棨未開

闔塹暗城無影晴新路不塵屯兵引畫劒騎吹動班輪
徒知仰睿藻抽辭殊未申

贈周處士

我行無歲月征馬屢盤桓崎曲三危岨
關從九折難猶持漢使節尚服楚臣冠
巢禽疑上幕驚鴻羽畏虛彈飛蓬去不已
客思漸無端壯志與時歇生平隨事闌
百齡悲促命數刻念餘觀雲生隴坻黑桑疎
薊北寒鳥道無蹊徑清漢有波瀾思君化
羽翮要我鑄金丹

別陸子雲

藝文作別
陸才子

解纜出南浦，征棹且凌晨。
還看分手處，唯餘送别人。
中流搖益影，邊江落騎塵。
平湖開曙日，細柳發新春。
滄波不可望，行雲聊共因。

奉和趙王途中五韻

飄飄映車幕，出沒望連旗。
度雲還翊陣，迴風即送師。
峽路沙如月，山峯石似眉。
村桃拂紅粉，岸柳被青絲。
錦城遙可望，迴鞍念此時。

和張侍中看獵

上林冬狩返回中講射歸還登宣曲觀更獵黃山圍嚴
冬桑柘慘寒霜馬騎肥縹盧隨兔起高鷹接雉飛獨嗟
來遠客辛苦倦邊衣

和庾司水修渭橋

東流仰天漢南渡似牽牛長堤通甬道飛梁跨造舟使
者開金堰太守擁河流廣陵候濤水荆峽望陽候波生
從故舶沙漲湧新洲天星識辨對檢玉應沈鈎空悅浮

雲賦非復採蓮謳

玄圃濬池臨泛奉和

長洲春水滿臨泛廣川中石璧如明鏡飛橋類飲虹垂
楊夾浦綠新桃緣徑紅對樓還泊岸迎波楚守風漁舟
釣欲滿蓮房採半空於茲臨北闕非復坐牆東

和從弟祐山家二首

採藥名山頂時節無春冬散雲非一色連嵒異衆峯合
杳似無徑間關定有蹊山牕臨絕頂檐溜俯危松空林

鳴暮雨虛谷應朝鐘仙童時可遇羽客屢相逢若值韓
衆藥當御長房龍

結交非俗士仙侶自招攜少華隱日月太乙尋虹霓衆
林積為籟園竹茂成堦幽谷曙無景荒途晝欲迷滴瀝
寒泉溜呴嘯秋猿啼白雲帝鄉起神禽丹穴棲箭篠時
通徑桃李復成蹊今身得其所羣物可令齊

詠鴈

伺潮聞曙響妬龍有春翬豈若雲中鴈秋時塞外歸河

長猶可涉海澗故難飛霜多聲轉急風疎行屢稀園池
若可至不復怯虞機

送觀寧侯葬

蒙羽高峻極淮泗導清源刑茅廣裂地跗萼盛開蕃紛
綸彤艤彩從容瓊玉溫衝飈搖栢榦烈火壯曾崑疇昔
同羈旅辛苦涉涼暄觀風方聽樂垂淚遽傷魂造舟虛
客禮高閨掩賓垣挂樹思公子芳草惜王孫今晨向郊
郭猶似背轔轔丹旐書空位素帳設虛樽楚琴南操絕

韓詩舊說存西靡傷新樹東陵惜故園自憐悲谷影彌

愴念一作玉闕門餘輝盡天末夕霧擁一作山根平原看

獨樹臯亭望列村寂寥還蓋靜荒茫歸路昏挽鐸已流

唱歌童行自喧囂言千載後誰將遊九原

送劉中書葬

昔別傷南浦今歸去北邙書生空托夢久客每思鄉塞
近邊雲黑塵昏野日黃陵谷俄遷變松柏易荒涼題銘

無復迹何處驗龜長

別王都官

連翩憫流客，悽愴惜離羣。
東西御溝水，南北會稽雲。
河橋兩堤絕，橫岐數路分。
山川遙不見，懷袖遠相聞。

送別裴儀同

河橋望行旅，長亭送故人。
沙飛似君幕，蓬捲若車輪。
邊衣苦霜雪，愁一作貌損。
秋風塵行路皆兄弟，千里念相親。

渡河北

范詩類選作
范雲者非

秋風吹木葉，還似洞庭波。
常山臨代郡，亭障繞黃河。

悲異方樂腸斷隴頭歌薄暮臨征馬失道北山阿

詠月贈人

月色當秋夜斜暉映薄帷上弦如半璧初魄似蛾眉渡
雲光忽駛中天影更遲高陽懷許掾對此益想思

和殷廷尉歲暮

歲晚悲窮律他鄉念索居寂寞灰心盡摧殘生意餘產
空交道絕財殫密親疎空悲趙壹賦還著虞卿書

看鬪鷄

跋蹀始橫行意氣欲相傾妬敵金芒起猜羣芥粉生入
場疑挑戰逐退似追兵誰知函谷下人去獨開城

彈棊

投壺生電影六博值仙人何如鏡奩上自有拂輕巾隔
澗疑將別隴頭如望秦握筆如思賦辭短竟無陳

從駕北郊

維皇敬明祀望拜出河東地靈開複道營星發紫宮衡
街響清蹕偵候起相風森沈羽林騎肅穆虎賁弓

和趙王隱士

鳬鵠均長短鵬鶴共逍遙清襟蘊秀氣虛席滿風飈
斷絃唯續葛獨酌止傾瓢菖蒲九重節桑薪七過燒

始發宿亭

送人亭上別被馬檻中嘶漠漠村烟起離離嶺樹齊落
星侵曉沒殘月半山低

關

山池落照

竹館掩金扉池光晦晚暉孤舟隱荷出輕棹染苔歸浴

禽時侶竄驚羽忽單飛

詠霧應詔

七條開早陌五里闊朝氛帶樓疑海氣含蓋似浮雲方
從河水上預奉綠圖文

入關故人別

百年餘古樹千里闊黃塵闊山行就近相看成遠人

過藏矜道館

松古無年月鵠去復來歸石壁藤為路山牕雲作扉

明慶寺石壁

夏水懸臺際秋泉帶雨餘石生銘字長山久谷神虛

雲居寺高嶺

中峯雲已合絕頂日猶晴色居隨望近風烟對眼生

詠定林寺桂樹

歲餘彫晚葉年至長新園月輪三五映鳥生八九飛

漢魏六朝百三家集卷一百十三



總校官庶吉士臣侍朝
校對官中書臣張墳
謄錄監生臣鄧肇槐

欽定四庫全書叢要

集部

漢魏六朝百三家集卷一百十四

詳校官候選知縣臣吳甸華

欽定四庫全書
舊要卷一萬九千七百九

集部

漢魏六朝百三家集卷一百十四

明 張溥 輯

隋煬帝集

詔

營東京詔

乾道變化陰陽所以消息沿創不同生靈所以順叙若使天意不變施化何以成四時人事不易為政何以釐

萬姓易不云乎通其變使民不倦變則通通則久有德
則可久有功則可大朕又聞之安安而能遷民用丕變
是故姬邑兩周如武王之意殷人五徙成湯后之業若
不因人順天功業見乎變愛人治國者果何謂歟然洛
邑自古之都王畿之内天地之所合陰陽之所和控以
三河固以四塞水陸通貢賦等故漢祖曰吾行天下多
矣唯見洛陽自古皇王何嘗不留意所不都者蓋有由
焉或以九州未一或以困其府庫作洛之制所以未暇

也我有隋之始便欲創茲懷雖日復一日越暨于今念
茲在茲興言感哽朕肅膺寶歷纂臨萬邦遵而不失心
奉先志今者漢王諒悖逆毒被山東遂使州縣或淪非
所此由關河懸遠兵不赴急加以并州移戶復在河南
周遷殷人意在於此況復南服遐遠東夏殷大因機順
動今也其時羣司百辟僉諧厥議但成周墟墳弗堪葺
宇今可於伊洛營建東京便即設官分職以為民極也
夫宮室之制本以便生上棟下宇足避風露高臺廣廈

豈曰適形故傳云儉德之共侈惡之大宣尼有云與其不遜也寧儉豈謂瑤臺瓊室方為宮殿者乎土增采椽而非帝王者乎是知非天下以奉一人乃一人以主天下也民惟國本本固邦寧百姓足孰與不足今所營構務從節儉無令雕牆峻宇復起於當今欲使卑宮菲食將貽於後世有司明為條格稱朕意焉

立七廟詔

聿追孝饗德莫至焉崇建寢廟禮之大者然則質文異

代損益殊時學滅坑焚經典散逸憲章湮墜廟堂制度
師說不同所以世數多少莫能是正連室異宮亦無準
定朕獲奉祖宗欽承業永惟嚴配思隆大典於是詢
謀在位博訪儒術咸以為高祖文皇帝受天明命奄有
區夏拯羣飛於四海革凋敝於百王恤獄緩刑生靈皆
遂其性輕徭薄賦比屋各安其業恢夷宇宙混一車書
東漸西被無思不服南征北怨俱荷來蘇駕毳乘風歷
代所弗至辯髮左衽聲教所罕及莫不歛角闋塞頓額

閼庭譯靡絕時書無虛月韜戈偃武天下晏如嘉瑞休
徵表裏禔福猗歟偉歟無得而名者也朕又聞之德厚
者流光治辨者禮縛是以周之文武漢之高光其典章
特立謚號斯重豈非緣情稱術即崇顯之義乎高祖文
皇帝宜別建廟宇以彰巍巍之德仍遵月祭用表蒸蒸
之懷有司以時創造務合典制又名位既殊禮亦異等
天子七廟事著前經諸侯二昭義有差降故其以多為
貴王者之禮今可依用貽厥後昆

修高廟樂詔

古先哲王經國成務莫不因人心而制禮則天明而作樂昔漢氏諸廟別所樂亦不同至於光武之後始立共堂之制魏文承運初營廟寢太祖一室獨為別宮自茲之後兵車交爭制作規模日不暇給伏惟高祖文皇帝功侔造物道濟生靈享薦宜殊樂舞須別今若月祭時饗既與諸祖共庭至於舞功獨於一室交違禮意未合人情其詳議以聞

為先代立後詔

昔周王下車首封唐虞之胤漢帝承厯亦命殷周之後皆所以褒立先代憲章在昔朕嗣膺景業傍求雅訓有一弘益欽若令典以為周兼夏殷文質大備漢有天下車書混一魏晉沿襲風流未遠竝宜立後以存繼絕之義有司可求其胄緒列聞

為孔子立後詔

先師尼父聖德在躬誕發天縱之資憲章文武之道命

世膺期蘊茲素王而頽山之歎忽踰於干祀盛德之美
不存於百代永惟懿範宜有優崇可立孔子後為紹聖
侯有司求其苗裔錄以申上

為前代帝王守陵墓詔

前代帝王因時創業君民建國禮尊南面而歷運推移
年世永久丘壘殘毀樵牧相趨瑩兆堙蕪封樹莫辨興
言淪滅有愴於懷自古已來帝王陵墓可給隨近十戶
蠲其雜役以供守視

為昔賢立祠詔

旌表先哲式存饗祀所以優禮賢能顯彰遺愛朕永鑒
前修尚想名德何嘗不興歎九原屬懷千載其自古已
來賢人君子有能樹聲立德佐世匡時博利殊功有益
於人者茲宜營立祠宇以時致祭墳壘之處不得侵踐
有司量為條式稱朕意焉

功臣襲封詔

夫帝圖草創王業艱難咸仗股肱叶同心德用能拯厥

頽運克膺大寶然後疇庸茂實開國承家誓以山河傳
之不朽近代喪亂四海未一茅土妄假名實相乖厯茲
永久莫能繼革皇運之初百度伊始猶循舊貫未暇改
作今天下交泰文軌攸同宜率遵先典永垂大訓自今
已後唯有功勲乃得賜封仍令子孫承襲

勲官不得回授職事詔

軍國異容文武殊用匡危拯難則霸德攸興化人成俗
則王道斯貴時方撥亂屠販可以登朝世屬隆平經術

然後升士豐都爰肇儒服無預于周行建武之朝功臣不參於吏職自三方未一四海交爭不遑文教唯尚武功設官分職罕以才授班朝治人乃由勲叙莫非拔足行陣出自豪夫敷學之道既所不習政事之方故亦無取是非暗於在己威福專於下吏貪冒貨賄不知紀極蠹政害民實由於此自今已後諸授勲官者竝不得回授文武職事庶遵彼更張取類於調瑟求諸名製不傷於美錦若吏部輒擬用者御史即宜糾彈

舉賢詔

天下之重非獨治所安帝王之功豈一士之畧自古明君哲后立政經邦何嘗不選賢與能收採幽滯周稱多士漢號得人常想前風載懷欽佇朕負辰夙興冕旒待旦引領巖谷寘以周行冀與羣才共康庶績而彙茅寂寢投竿罕至豈美璞韜采未值良工將介石在懷確乎難拔永鑒前哲撫然興歎凡厥在位譬諸股肱若濟巨川義同舟檝豈得保茲寵祿晦爾所知優游卒歲甚非

謂也祈大夫之舉善良史以為至公臧文仲之蔽賢尼父譏其竊位求諸往古非無褒貶宜思進善用匡寡薄夫孝弟有聞人倫之本德行敦厚立身之要或節義可稱或操履清潔所以激貪厲俗有裨風化強毅正直執憲不撓學業優敏文才美秀竝為廊廟之用實乃瑚璉之資才堪將畧則拔之以禦侮膂力驍壯則任之以爪牙爰及一藝可取亦宜採錄衆善畢舉與時無棄以此求治庶幾非遠文武有職事者五品以上宜依令十科

舉人有一於此不必求備朕當待以不次隨才升擢其見任九品已上官者不在舉送之限

勵經術詔

君民建國教學為先移風易俗必自茲始而言絕義乖多歷年代進德修業其道寢微漢採坑焚之餘不絕如線晉承板蕩之運掃地將盡自時厥後軍國多虞雖復寰宇時建示同愛禮函丈或陳殆為虛器遂使紝青拖紫非以學優製錦操刀類多牆面上陵下替綱維靡立

雅缺道消實由於此朕纂承洪緒思弘大訓將欲尊師重道用闡厥繇講信修睦敦獎名教方今宇宙平一文軌攸同十步之內必有芳草四海之中豈無奇秀諸在家及見入學者若有篤志好古耽悅典墳學行優敏堪膺時務所在採訪具以名聞即當隨其器能擢以不次若研精經術未願進仕者可依其藝業深淺門蔭高卑雖未升朝竝量準給祿庶夫恂恂善誘不日成器濟濟盈朝何遠之有其國子等學亦宜申明舊制教習生徒

具為課試之法以盡砥礪之道

巡省風俗詔

昔者哲王之治天下也其在愛民乎既富而教家給人足故能風淳俗厚遠至邇安治定功成率由斯道朕嗣膺寶歷撫育黎獻夙夜戰兢若臨川谷雖則聿遵先緒弗敢失墜永言政術多有缺然況以四海之遠兆民之衆未獲親臨問其疾苦每慮幽仄莫舉寃屈不申一物失所乃傷和氣萬方有罪責在朕躬所以寤寐增歎而

夕惕載懷者也今既布政惟始宜存寬大可分遣使人
巡省方俗宣揚風化薦拔幽滯申達幽枉孝悌力田給
以優復鰥寡孤獨不能自存者量加賑濟義夫節婦旌
表門閭高年之老加其版授竝依別條賜以粟帛篤疾
之徒給侍丁者雖有侍養之名曾無調贍之實明加檢
校使得存養若有名行顯著操履修潔及學業才能一
藝可取咸宜訪採將身入朝所在州縣以禮發遣其有
蠹政害人不便於時者使還之日具錄奏聞

尚齒詔

優德尚齒載之典訓尊事乞言義彰膠序鬻熊為師取
非筋力方叔元老克壯其猷朕永言稽古用求至治是
以厖眉黃髮更令收叙務簡秩優無虧藥膳庶等卧治
佇其弘益今歲耆老赴集者可於近郡處置年七十以
上疾患沈滯不堪居職即給賜帛送還本郡其官至七
品已上者量給廩以終厥身

緝民詔

設險守國著自前經重門禦暴事彰往策所以宅土寧
邦禁邪固本而近代戰爭居人散逸田疇無伍鄴郭不
修遂使遊惰實繁寇藪未息今天下平一海內晏如宜
令人悉城居田隨近給使強弱相容力役兼濟穿窬無
所厝其姦宄萑蒲不得聚其逋逃有司具為事條務令
得所

教義詔

武有七德先之以安民政有六本興之以教義高麗高

元虧失藩禮將欲問罪遼左恢宣勝畧雖懷伐國仍事
省方今往涿郡巡撫民俗其河北諸郡及山西山東年
九十已上者版授太守八十者授縣令

安集詔

古者帝王觀風問俗皆所以憂勤兆庶安集遐荒自蕃
夷內附未遑親撫山東經亂須加存卹今欲安集河北
巡省趙魏所司依式

恤行役詔

朕觀風燕裔問罪遼濱文武叶力爪牙思奮莫不執銳
勤王捨家從役罕蓄倉廩之資兼損播殖之務朕所以
夕惕愀然慮其匱乏雖復素飽之衆情在忘私悅使之
人宜從其厚諸行從一品以下佽飛募人以上家口郡
縣宜數存問若有糧食乏少皆宜賑給或雖有田疇貧
弱不能自耕種可於多丁富室勸課相助使夫居者有
斂積之豐行役無顧後之慮

達幽枉詔

聽採輿頌謀及庶民故能審政刑之得失是知昧旦思
治欲使幽枉必達彝倫有章而牧宰任稱朝委苟為徵
幸以求考課虛立殿最不存治實綱紀於是弗理寃屈
所以莫申闢河重阻無由自達朕故建立東京躬親存
問令將巡歷淮海觀省風俗眷求讜言徒繁詞翰而鄉
校之內闕爾無聞恇然夕惕用忘興寢其民下有知州
縣官人政治苛刻侵害百姓背公徇私不便於民者宜
聽詣朝堂封奏庶乎四聰以達天下無寃

寬連坐詔

罪不及嗣既弘至孝之道恩由義斷以勸事君之節故羊鈞從戮彌見叔向之誠季布立勲無預丁公之禍用能樹聲往代貽範將來朕虛己為政思遵舊典推心待物每從寬政六位成象美厥含弘一眚掩德甚非謂也諸犯罪被戮之門幕已下親仍令合仕聽預宿衛近侍

之官

改博陵為高陽郡詔

博陵昔為定州地居衝要先皇歷試所基王化斯遠故
以道冠幽風義高姚邑朕巡撫民庶爰届茲邦瞻望郊
塵緬懷敬止思所以宣布德澤覃被下人崇紀顯號式
光令緒可改博陵為高陽郡赦境內死罪已下給復一
年

埋祭死亡軍士詔

竭力王役致身戎事咸由徇義莫匪勤誠委命草澤棄
骸原野興言念之每懷愍惻往年出車問罪將屆遼濱

廟算勝畧具有進止而諒情凶罔識成敗高頰懷狠本無智謀臨三軍猶兒戲視人命如草芥不遵成規坐貽撓退遂令死亡者衆不及埋藏今宜遣使人分道收葬設祭於遼西郡立道場一所恩加泉壤庶彌窮魂之寃澤及枯骨用弘仁者之惠

親征高麗詔

天地大德降繁霜於秋令聖哲至仁著甲兵於刑典故知造化之有肅殺義在無私帝王之用干戈蓋非獲已

版泉丹浦莫匪冀行取亂覆昏咸由順動況乎甘野誓
師夏開成大禹之業商郊問罪周發成文王之志永監
前載屬當朕躬粵我有隋誕膺靈命兼三才而建極一
六合而為家提封所漸細柳盤桃之外聲教爰暨紫舌
黃枝之域遠至通安固不和會功成治定於是乎在而
高麗小醜迷昏不恭崇聚勃碣之間薦食遼獮之境雖
復漢魏誅戮巢窟暫傾亂離多阻種落還集萃川藪於
往代播實繁以迄今睠彼華壤翦為夷類閏年永久惡

稔既盈天道禍淫亡徵已兆亂常敗德非可勝圖掩慝
懷姦惟日不足移告之嚴未嘗面受朝覲之禮莫肯躬
親誘納亡叛不知紀極充斥邊陲亟勞烽候闕析以之
不靜生人為之廢業在昔薄伐已漏天網既緩前禽之
戮未即後服之誅曾不懷恩畿為長惡乃兼契丹之黨
虔劉海戍習靺鞨之服侵軼遼西又青丘之表咸修職
貢碧海之濱同稟正朔遂復效攘琛責遏絕往來虐及
弗辜誠而遇禍輜軒奉使爰暨海東旌節所次途經藩

境而擁塞道路拒絕王人無事君之心豈為臣之禮此
而可忍孰不可容且法令苛酷賦斂煩重強臣豪族咸
執國鈞朋黨比周以之成俗賄貨如市寃枉莫申重以
仍歲災凶比屋饑饉兵戈不息徭役無期力竭轉輸身
填溝壑百姓愁苦爰誰適從境內哀惶不勝其弊迴首
面內各懷性命之圖黃髮稚齒咸興酷毒之歎省俗觀
風爰届幽朔弔人問罪無俟再駕於是親總六師用申
九伐極厥阽危協從天意殄茲逋穢克嗣先謨令宜授

律啓行分麾届路掩渤海而雷震歷夫餘以電掃比戈
按甲誓旅而後行三令五申必勝而後戰左第一軍可
鏤方道第二軍可長岑道第三軍可海寧道第四軍可
蓋馬道第五軍可建安道第六軍可南蘇道第七軍可
遼東道第八軍可元菟道第九軍可扶餘道第十軍可
朝鮮道第十一軍可沃沮道第十二軍可樂浪道右第
一軍可黏蟬道第二軍可含資道第三軍可渾彌道第四
軍可臨屯道第五軍可候城道第六軍可提奚道第七

七軍可踏頓道第八軍可肅慎道第九軍可碣石道第十軍可東曉道第十一軍可帶方道第十二軍可襄平道凡此衆軍先奉廟畧絡繹引途總集平壤莫非如豺如貔之勇百戰百勝之雄顧盼則山岳傾頽叱吒則風雲騰鬱心德攸同爪牙斯在朕躬馭元戎為其節度涉遼而東循海之右解倒懸於遐裔問疾苦於遺黎其外輕齋遊闕隨機赴響卷甲銜枚出其不意又滄海道軍舟艤千里高驅電逝巨艦雲飛橫斷沮江逕造平壤島

嶼之望斯絕坎井之路已窮其餘被髮左衽之人控弦
待發微盧彭濮之旅不謀同辭杖順臨逆人百其勇以
此衆戰勢等摧枯然則王者之師義存止殺聖人之教
必也勝殘天罰有罪本在元惡人之多僻脇從罔治若
高元泥首轅門自歸司寇即宜解縛焚櫬弘之以恩其
餘臣人歸朝奉順咸加慰撫各安生業隨才任用無隔
夷夏營壘所次務在整肅芻蕘有禁秋毫勿犯布以恩
宥喻以禍福若其同惡相濟抗拒官軍國有常刑俾無

遺類明加曉示稱朕意焉

再伐高麗詔

黃帝五十二戰成湯二十七征方乃德施諸侯令行天下盧芳小盜漢祖尚且親征隗囂餘燼光武猶自登龍豈不欲除暴止戈勞而後逸者哉朕纂成寶業君臨天下日月所照風雨所沾孰非我臣獨隔聲教蕞爾高麗僻居荒表鴟張狼噬侮慢不恭抄竊我邊陲侵秩我城鎮是以去歲出軍問罪遼碣殲長蛇於元菟戮封豕於

襄平扶餘衆軍風馳電逝追奔逐北徑踰沮水滄海舟
櫛衝賊腹心焚其城郭汙其宮室高元伏鑽泥首送款
軍門尋請入朝歸罪司寇朕以許其改過乃詔班師而
長惡不悛宴安鳩毒此而可忍孰不可容便可分命六
師百道俱進朕當親執武節臨御諸軍秣馬完都觀兵
遼水順天誅於海外救窮民於倒懸征伐以正之明德
以誅之止除元惡餘無所問若有識存亡之分悟安危
之機翻然北首自求多福必其同惡相濟抗拒王師若

火燎原刑茲無赦有司便宜宣布咸使聞知

勞楊素手詔

我有隋之御天下也于今二十有四年雖復外夷侵叛而內難不作修文偃武四海晏然朕以不天銜恤在疚號天叩地無所逮及朕本以藩王謬膺儲兩復以庸虛纂承洪業天下者先皇之天下也所以戰戰兢兢弗敢失墜況復神器之重生民之大哉賊諒苞藏禍心自幼而長羊質獸心假託名譽不奉國諱先圖叛逆違君父

之命成莫大之罪詎惑良善委任奸回稱兵內侮毒流百姓私假署置擅用謀戮小加大少陵長民怨神怒衆叛親離為惡不同同歸於亂朕寡兄弟猶未忍及言是故開闢門而待寇戢干戈而不發朕聞之天生蒸民為之置君仰惟先旨每以子民為念朕豈得枕伏苦廬顛而不救也大義滅親春秋高義周旦乃誅二叔漢啟乃戮七藩義在茲乎事不獲已是以授公戎律問罪太原且逆子賊臣何代不有豈意今者近出家國所歎荼毒

甫爾便及此事由朕不能和兄弟不能安蒼生德澤未
弘兵戈先動賊亂者止一人塗炭者乃衆庶非惟寅畏
天威亦乃孤負付囑薄德厚恥愧乎天下公乃先朝功
臣勳庸克茂至如皇基草創百物惟便始匹馬歸朝誠
識兼至汴部鄭州風卷秋籜荆南塞北若火燎原早建
殊勳夙著誠節及獻替朝端具瞻惟允爰弼朕躬以濟
時難昔周勃霍光無以加也賊乃竊據蒲州關梁斷絕
公以少擊衆指期平殄高壁據盜抗拒官軍公以深謀

出其不意霧廓雲除冰消瓦解長驅北邁直趣巢窟晉
陽之南蟻徒數萬諒不量力欲猶舉斧公以稜威外討
發憤於內忘身殉義親當矢石兵刃斃交魚潰鳥散僵
屍蔽野積甲若山諒遂守窮城以拒鉄鍼公董率驍勇四
面攻圍使其欲戰不敢求走無路智力俱盡面縛軍門
斬將搴旗伐叛柔服元惡既除東夏清晏嘉庸茂績於
是乎在昔武安平趙淮陰定齊豈若公遠而不勞速而
克捷者也朕殷憂諒闇不得親御六軍未能問道於上

庠遂使劬勞於行陣言念於此無忘寢食公乃建異世
之元勳執一心之確志古人有言曰疾風知勁草世亂
有誠臣公得之矣方乃銘之常鼎豈止書勲竹帛哉功
績克諧哽歎無已稍冷公如宜軍旅務殷殊當勞慮故
遣公弟指宣往懷迷塞不次

為楊素立碑詔

夫銘功彝器紀德豐碑所以垂名迹於不朽樹風聲於
沒世故楚景武公素茂績元勳劬勞王室竭盡誠節叶

贊朕躬故以道邁三傑功參十亂未臻遐壽遽戢清微
春秋遞代方綿歲祀式播雕篆用圖勳德可立宰隧以
彰盛美

手詔史祥

昔歲勞公問罪河朔賊爾日塞兩闕之路據倉阻河百
姓脇從人亦衆矣公竭誠奮勇一舉克定詩不云乎喪
亂既平既安且寧非英才大畧其孰能與於此邪故聊
示所懷亦何謝也

褒樊子蓋詔

子蓋為武威太守以善政聞大業三年入朝帝引之內殿特蒙褒美乃下詔

設官之道必在用賢安人之術莫如善政冀汲振德化於前張杜垂清風於後共治天下實資良守子蓋幹局通敏操履清潔自剖符四服愛惠為先撫道有方寬猛得所處腴膏不潤其質酌貪泉豈渝其性故能治績克彰課最之首凡厥在位莫匪王臣若能人思奉職各展其効朕將冕旒垂拱何憂不治哉

詔樊子蓋

卿夙懷恭順深執誠心聞朕西巡欣然望幸丹款之至甚有可嘉宜保此純誠克終其美

又褒樊子蓋詔

車駕西巡子蓋獻青木香以禦霧露及帝還謂之曰人道公清定如此不子蓋謝曰臣安敢言清止是小心不敢納賄耳賜口味百餘斛又下詔

遵德齊禮寔惟共治懲惡勸善用明黜陟朕親巡河右觀省人風所歷郡縣訪採治績罕違法度多蹈刑網而

金紫光祿大夫武威太守樊子蓋執操清潔處涅不渝
立身雅正臨人以簡威惠兼舉寬猛相資故能畏而望
之不嚴斯治實字人之盛績有國之良臣宜加褒顯以
弘獎勵可右光祿大夫太守如故賜繢千疋粟麥二千
斛

加蘇威開府儀同三司詔

玉以潔潤丹紫莫能渝其質松表歲寒霜雪莫能凋其
采可謂溫仁勁直性之然平房公威器懷溫裕識量弘

雅早居端揆備悉國章先皇舊臣朝之宿齒棟梁社稷
弼諧朕躬守文奉法卑身率禮昔漢之三桀輔惠帝者
蕭何周之十亂佐成王者邵奭國之寶器其在得賢參
變台階具瞻斯允雖復事藉論道終期獻替銓衡時務
朝寄為重可開府儀同三司餘竝如故

以衛玄為光祿大夫詔

近者妖氛充斥擾動關河文昇率勵義勇應機響赴表
裏奮擊摧破兇醜宜升榮命式弘賞典可右光祿大夫

贈劉方上柱國盧國公詔

方肅承廟畧恭行天討飲冰遙邁視險若夷摧鋒直指
出其不意鯨鯢盡殪巢穴咸傾役不再勞肅清海外致
身王事誠績可嘉可贈上柱國盧國公

贈豆盧毓大將軍詔

襤顯名節有國通規加等飾終抑推令典毓深識大義
不顧姻親出於萬死首建奇策去逆歸順殉義亡身追
加榮命宜優恒禮可贈大將軍封正義縣公賜帛二千

定謚曰愍

改封豆盧毓雍丘侯詔

故大將軍正義愍公毓臨節能固捐生殉國成為令典
沒世不忘象賢無墜德隆必祀改封雍丘愍侯復以願
師承襲

追贈獨孤陁詔

外氏衰禍獨孤陁不幸早世遷卜有期言念渭陽之情
追懷傷切宜加禮命允備哀榮可贈正議大夫

又

舅氏之尊戚屬斯重而降年弗永凋落相繼緬惟先往宜崇徽秩復贈銀青光祿大夫

責蘇威詔

威立性朋黨好為異端懷挾詭道徼幸名利詆訶律令謗訕臺省昔歲薄伐奉述先志凡預切問各盡胸臆而威不以開懷遂無對命啟沃之道其若是乎資敬之義何其甚薄

徙衛王集滕王綸詔

綸集以附萼之華猶子之重糜之好爵匪由德進正應
與國升降休戚是同乃包藏妖禍誕縱邪僻在三之義
愛敬俱淪急難之情孔懷頓滅公卿議既如此覽以潛
然雖復王法無私恩從義斷但法隱公族禮有親親致
之極辟情所未忍可除名為民遠徙邊郡

優突厥詔

突厥意利珍豆啟民可汗率領部落保附關塞遵奉朝

化思改戎俗頻入謁覲屢有陳請以氈牆毳幕事窮荒陋上棟下宇願同比屋誠心懇切朕之所重宜於萬壽戍置城造屋其惟帳牀禡已上隨事量給務從優厚稱朕意焉

答議突厥改服詔

突厥啟民表請乞依華夏服飾公卿請依所表帝以為不可乃下詔

先王建國夷夏殊風君子教民不求變俗斷髮文身咸安其性旃裘卉服各尚所宜因而利之其道弘矣何必

化諸削任縻以長纓豈遂性之至理非包含之遠度衣
服不同既辨要荒之叙庶類區別彌見天地之情

賜啟民位侯王上詔

德合天地覆載所以弗遺功格區寓聲教所以咸洎至
於梯山航海請受正朔襲冠解辭同彼臣民是故王會
納貢義彰前冊呼韓入臣待以殊禮突厥意利珍寶啟
民可汗志懷沈毅世修藩職往者挺身違難投足歸仁
先朝嘉此款誠授以徽號資其甲兵之衆收其破滅之

餘復祀於既亡之國繼絕於不存之地斯固施均亭育
澤漸要荒者矣朕以薄德祇奉靈命思播遠猷光融令
緒是以親巡朔野撫寧藩服啟民深委誠心入奉朝覲
率其種落拜首軒墀言念丹款良以嘉尚宜隆榮數式
優恒典可賜路車乘馬鼓吹幡旗贊拜不名位在諸侯
王上

與高昌國王詔

彰德嘉善聖哲所隆顯誠遂良典謨貽則光祿大夫弁

國公高昌王伯雅識量經遠器懷溫裕丹款夙著亮節
遐宣本自諸華歷祚西壤昔因多難淪迫獯戎數窮毀
冕翦為胡服自我皇隋平一宇宙化偃九圍德加四表
伯雅踰沙忘阻奉責來庭觀禮容於舊章慕威儀之盛
典於是襲纓解辯削衽曳裾變夷從夏義光前載可賜
衣冠之具仍班製造之式并遣使人部領將送被以采
章復見車服之美棄彼氳毳還為冠帶之國

勅

宣齊王勅

帝拜柳謇之為齊王長史帝法師臨軒命齊
王立朝堂之前遣牛弘等引謇之詣齊王所

西面立宣

勅謂王

我昔階緣恩寵啟封晉陽出藩之初時年十二先帝立
我於西朝堂乃令高頻虞慶則元昊等從內送王子相
於我於時誠我曰以汝幼冲未更世事今令子相作輔
於汝事無大小皆可委之無得近昵小人疎遠子相若
從我言者有益於社稷成立汝名行如有不用此言唯

國及身敗無日矣吾受勅之後奉以周旋不敢失墜微子相之力吾無今日矣若與謇之從事一如予相也

與柳謇之勅

今以卿作輔於齊善思匡救之理副朕所望若齊王德業修備富貴自當鍾卿一門若有不善罪亦相及

勅度四十九人法名

皇帝勅皇帝敬問括州國清寺沙門智越法師等僧使智璪至得書具至懷天台福地實為勝境所以敬為智

者建立伽藍法緣既深尊師義重欲使宗匠遺範奉而
弗墜菩薩淨業久而彌親然則去聖久遠學徒陵替規
求利養不斷俗緣滋味甘腴違犯戒律此乃增長罪垢
豈謂福田師等離有為法求無上道棄俗諸漏鑑在雅
懷由須獎訓末學弘修淨行俾夫法門等侶咸歸和合
諸佛禁戒畢竟遵行又此寺嘉應事表先覺既理由冥
感即號國清寺并有施物用申隨喜冬序甚寒道體清
豫朕巡省風俗爰屆江都瞻望山川載深勞想故遣兼

通事舍人盧政力往指此不多

行道度人天下勅

大業三年正月二十八日菩薩戒弟子皇帝總持稽首
和南十方一切諸佛十方一切尊法十方一切賢聖僧
竊以妙靈不測感報之理遂通因果相資機應之徒無
爽是以初心爰發震動波旬之宮一念所臻咫尺道場
之地雖則聚沙蓋鮮實覆簣於耆山水滴已微乃濫觴
於法海弟子階緣宿植嗣膺寶命臨御區宇寧濟蒼生

而德化弗弘刑罰未止萬方有罪寔當憂責百姓不足
用增塵累夙夜戰兢如臨淵谷是以歸心種覺必冀慈
愍謹於率土之內建立勝緣州別請僧七日行道仍總
度一千人出家以此功德竝為一切上及有頂下至無
間蜎飛蠕動預稟識性無始惡業今生罪垢藉此善緣
皆得清淨三塗黎獻六趣怨親同至菩提一時作佛

璽書

降來護兒璽書

公旋師之時是朕勅公之日君臣意合遠同符契梟此元惡期在不遙勒名太常非公而誰也

答突厥啟民璽書

磧北未靜猶須征戰但使好心孝順何必改變衣服也

檄

遺陳尚書江總檄

南北雖殊風雲在望載懷虛遲寤寐為勞獻歲猶寒比當清豫匡贊乎國良亦懇勤寡人忝膺朝寄董律專征

跋涉山川今次江際公等文儒目立器用適時冠蓋二
世齒德兼重孔老殊教名墨異家金匱珠韜銀編玉策
莫不謄於舌杪散在筆端邃古成敗之機近代安危之
跡照同懸鏡明若觀火無待指南自應神悟猶恐思之
未審差以毫釐聊煩翰墨畧申梗槩自穹昊生民樹之
司牧義軒以降書契可紀咸一姓承立四海無兩帝漢
道云季三方鼎立時惟版蕩世匪休明當塗起而蜀亡
典午興而吳滅永嘉喪亂紫宸曠主劉石苻姚之儔偽

夏僭燕之醜妄塵大寶事乖圖錄魏室乘時兆基朔野
經始嵩洛未暇江湖有周受命敵非齊氏務在薰并不
遑外畧蕞爾吳越自相君長竊擬王者之儀妄談天子
之氣偷安假息鰥歷世祀我大隋之肇開寶祚光有神
州皇帝感曜魄之靈應太微之座千年啟聖萬代一時
深仁至德寧濟羣品越海窮河東漸西被旄頭之屬歷
代之霸作我臣民匍匐服裳惟彼江表獨隔皇風夫物
極則反否終斯泰郭璞有云年經三百天下大同茲實

玄運已定於前聖主膺期而出欲以區區之陳國違上
天之冥數其不可存者一也大必包小天地之常規明
能通暗日月之常理論道德以唐陶而征有苗語衆寡
舉海內而當羣小在長江舟檝之用矜其積習而山川
共存我據上游鼓棹之能吳楚不異高艤巨舫東西萬
里扼喉撫背水陸千途彼之兵士不過十萬首尾分布
所在危急加以屯戍邊方淹積歲序風雨以為櫛沐蟻
虱生於甲冑望我寬仁思倒戈戟通在戎行更成敵國

守以時月則魚爛土崩接以鋒刃則鳥驚鹿走理在必然不假枚卜此不可存者一也豐侯好酒實喪厥邦梁伯役民潰其宗社彼之偽主覆車是襲日夜沈湎曾無節度繕造宮室莫知窮已竭四民之產荒縱其心斂百姓之哀以為己樂寶衣玉食墳積後宮短褐麤餧不充編戶一芥之善蔑爾無聞五子之歌宛然悉備雖欲勿喪其可得乎此不可存者二也偽主忌能護短酷法淫刑骨鯁之臣盡見疎斥諍諫之臣皆被屠害遐邇結舌

衣冠解體人妖鬼怪觸類呈灾稚齒耆年咸知殘滅此不可存者四也以此小邦攝於大國邊烽夜動照彼都城戍鼓晨嚴震其宮殿累棊十二方此未危懸縷干鈞比斯非切而莫知憂恐更自驕矜曾無事大之心專行犯上之志侵軼我邊鄙招納我叛亡國家爰自受命每從含養敦以隣睦申其聘好冀能守彼宗祊靜其疆域而長惡益甚縱毒彌深吳會雄俊之人湘郢耿介之士乞師請命盈庭滿闋帝乃憫然矜彼黎獻授鉞推轂弔

民伐罪已有別詔惟廢偽主之身自餘士庶普從肆青
向所陳說咸是格言非曰游談共相欺誤且劉叔納譙
周之計而獲存孫皓用薛瑩之詞而致福此二子者終
有良臣之譽皆無陷君之譏何則所恥者小所存者大
若憲章往彥聿遵前軌則為主享封侯之業祖禰延血
食之期江東士民實受其賜公等身保榮貴名垂竹帛
豈不美歟若膠柱不移守迷莫變率其蟻衆敢拒王師
軍有常刑悔無及矣禍成俄頃宜早圖之使人今還遲

有委曲言不盡意豈復多云楊廣白

令

與天台山衆令

仁壽元年正月永嘉僧法曉生聞智者勝德
特至龕所旋繞千拜一夕龕戶自開光照林
木衆共瞻禮又張造者年邁足廢登龕拜祝
願得度脫忽聞龕中應聲及以彈指灌頂等

啟聞皇太

子與書

僧使灌頂智璪至覽十一月三日書并陳靈龕應迹顯
形放光彈指流音應念傳響斯實不可思議力變化多方

感悟有緣示希有事慎終追遠感歎相深在昔雙林示
滅非滅多寶獨塔俟時涌現爰在狼迹迦葉分身乃至
鷲山迦文留影眉毫散彩指端震室豈非像教能度無
邊是大因緣聞善知識永惟宿昔獲承師範德音盈耳
神光在目方憑靈瑞係踵菩提肅承靈誥宣慰南服山
衆法徒同志為友曾成等侶方共舟航歲暮凝寒念皆
道勝天台名嶽海岸所推修建大林多慙重閣三時設
供四事不周想甘禪悅以同法喜其間敬德信次相聞

今遣員外散騎侍郎張乾威送僧使還山於舊所設供
庶同甘露能變麓溢亦憑香積證道融銷書不盡言反
此無悉楊廣和南僧使灌頂等所領今施物目仁壽元年十二月十七日白石香爐一具并香合一枚大銅鐘一口鵠納袈裟一領鵠納褊袒二領四十九尺幡七口黃綾裙一腰氈二百領絲布祇支二領小幡一百口和香二合胡桃一籠衣物三百段奈紗一合石鹽一合酥六餅

書

遺史祥書

煬帝初為晉王祥從擊突厥於靈武破之遷右衛將軍屯弘化備胡時帝在東宮遺祥書

將軍總戎塞表胡虜清塵秣馬休兵猶事校獵足使李廣慙勇魏尚媿能冠彼二賢獨在吾予昔余濫舉推轂治兵振皇靈於塞外驅犬羊乎大漠於時同行軍旅契闊戎旃望龍城而衝冠盼狼居而發憤將軍英圖不世猛氣無前但物不遂心僥俛從事每一思此我勞如何將軍宿心素志早同膠漆久而敬之方成魚水近者陪隨鑾駕言旋上京本即述職南蕃宣條下國不悟皇鑒曲發備位少陽戰戰兢兢如臨冰谷至如建節邊境征

伐四方塞惟作牧綏撫百姓上稟成規下盡臣節是所
願也是所甘心仰慕前修庶得自效謬其入守神器元
良萬國身輕負重何以克堪所望故人匡其不逮比監
國多暇養疾閑宮厭北閣之端居罷南皮之馳射博望
之苑既乏名賢飛蓋之園理乖終日親朋遠矣琴書寂
然想望吾賢疹如疾首

遺延智頴書

帝晉王時為揚州總管遣使奉迎師曰我與
晉王深有緣契即束衣順流不日而至王請

受菩薩戒顛謂王曰大王紓遵聖禁可名總持王贊顛曰大師傳佛法燈宜稱智者自後王諸書往來皆稱弟

子總持稱師為智者

金風御節玉露調時道體休和安樂行不法師抗志名山棲心慧定法門靜悅戒行熏修籍甚徽猷久承音德欽風已積味道為勞冀託舟航用披雲霧故遣使人往彼延屈希望能輕舉以沃虛襟佇望來儀不乖眷意也弟予楊廣和南

治禪衆寺答智顛書

頤受戒既畢出居城外禪泉
寺開皇十二年復還廬山

深具謙挹之旨但高人游處觸地是安然法宇僧坊須
盡嚴正經云四事供養一不可虧已勑有司修葺願忘
懷受施也弟子楊廣和南

法諱奉智者書

弟子總持和南柳顧言還奉旨垂示六種捨施及留受
用弟子一日恭覲猶以陋薄不稱宿心來旨既以轉施
功德彌為增上恭敬福田深是平等固非蔽識所能周

見事事仰依其所留者既以不多願恒留受用故遣報

諮詢和南

參智者書

弟子總持和南履長戒辰在俗咸慶伏惟吐納禪慧與
時休和弟子稟受以來粗堪靜攝謹遣參承謹和南

請留智者書

開皇十一年十一月受晉王戒畢出居禪衆
寺即欲西上王遣柳顧言致書請留待來年
二月約至棲霞送別又宣口勅云智者為當
長去更有還期弟子意不欲相去遼遠脫能

旋迴不敢留停鎮下近山隨樂住止又欲奉
留待二月十八日同度延陵鎮仍共至棲霞
履行於彼送別十二年三月頡將啟行王復
致書請就攝山安居度夏頡不許王命有司

具裝發遣頡

遂至止廬山

弟子總持和南爰逮來誨須往荆楚辭致首尾仰具高
懷但祇稟淨戒事成甫爾宿昔凝滯匪遑諸決闇黎和
尚經稱勝田種子雖投嘉苗木植方用心形永伸供養
庶憑善誘日灑塵勞凡厥共緣依止有地斯亦舟航兼
運利益弘多如來化導何必止還天竺菩薩應變本無

定方深願坦然以虛受物遲延展禮面當誥遜謹和南

重留智者書

弟子總持和南逮旨須取明二日垂別修復未周便深
傾欵弟子前昨晝夜熟更惟忖智者至止以來未經一
夏兼荆潭路遠安居將促江波浩蕩行程難期既去此
處又不至前所半途結夏投止亦難又按經律一夏供
養安居僧福田無量況乎師道及大眾力凡夫淺薄本
資勝緣菩薩大慈須受應供暮春行謝首夏向臻九旬

忽違四事虛棄修心與理於情匪安令欲仰留度夏發
遣冀不半途飄落脫疑邑下喧湫須依林壑安居攝山
亦當為便若法歲將滿預勒蔣州裝船南出石頭西游
彌易既乘爽節因得順風去留之宜事理咸會此間彼
處仰聽擇一意不可盡辭豈多宣謹和南

三月一日

許智者行書

弟子總持和南復逮今旨欲遂前心功德因緣豈敢違
忤謹遵宿願即命所司發遣發日離晨仰聽詳擇庶解

夏非遠秋水乘流賜答來期必當無爽用茲歡喜蠲悲

欵謹和南

謝法門書

弟子總持和南奉旨今日齋竟即事登舟睽阻方遙彌以傾欵垂示法相雖文旨淵蹟源本難尋而教門方便開悟易益恭承善誘永以受持庶藉津梁得無退轉自服膺至道每沾弘護將事遵途復降良藥沐浴慈被伏用悽荷謹和南

遣使往匡山叅書

開皇十二年七月王遣書廬山參省八月頤
往衡山營建功德十一月王遣書潭州奉迎

十二月至荊州

創立玉泉寺

弟子總持和南親信傳仲詵還逮去月朔告用慰延結
熱猶熾願道體休和仰承經過攝山鍾岫寺塔安善徒
衆和肅仍留二十僧權停開善進至匡嶽結夏安居東
林禪閣還為一寺峰頂精舍復皆隨喜敬緣勸發獲此
熏修用耨身田方流法雨金光明福喜荷彌深弟子去

月十四日始度朱方風土異宜流金在節攝衛多不調適每有劣然二十九日來石頭稍已平復自江浦違心馳情彭蠡以日為歲無時暫忘願未解夏前預整裝束法歲若滿即事西浮彼間酬願務令在促非但弟子蔽識希護周爰深恐禪慧學徒咸思鑽仰宣尼在陳致嘆自衛便歸屈道紓情事非為已今遣主簿王灌指往祇承并貢別牒用忘存省敢畧繁辭謹和南七月一日
法衣六件鹽

一百斛米

重遣匡山參書

弟子總持和南東林山寺使至逮八月八日誨用慰馳
結仰承已往衡山至當稍久法緣若竟願即沿流冀在
歲陰必期展覲弟子渡江還去月初移新住多有造次
未善安立來旨勗以法事實用慙悚始於所居外援建
立慧日道場安置照禪師以下江陵論法師亦已遠至
於內援建立法雲道場安置潭州覺禪師以下即建深
善輒以諮知仰承相次為營功德深荷扶助難用遠陳

而發此至江州遂下請僧料云何能得相資前施鹽米
其未迥入東林鹽以上路盈長之外乃可別營功德今
山僧返路行用仰酬尋別遣使迎延願預整歸計江山遼
夏豈盡誠曲謹和南十月十日

答智顥述匡山寺書

弟子總持和南垂誨述江州潯陽廬山東林寺峯頂寺
須令弟子立為檀越主山嶺盤秀下屬江湖香爐層峰
上虧雲日仙人之所戾止隱淪於焉不歸況乎慧遠法

師勝依結構謝客梁元穿池重閣景師息心神應峰頂
智者憩歷踵武前賢師嚴道尊實深隨喜所恨寡薄無
益將來庶藉熏修方證常樂兼陳二寺偏近驛道行人
往來頗成混雜須勅彼州令去公私使命不得停止即
付所司依事頒下謹和南三月一日

與匡山三寺書

極暄法師道體何如衆內咸宜也雁門遠法師四依菩
薩飄飛朔野棲息南山自斯以後名德相繼智者見令

為寺檀越顧修寡薄非敢克當獎導既引良深隨喜敬

德指此承問楊廣和南

三月二十一日

與峰頂寺書

暮春暄和寺衆清勝禪悅法喜致足恬懷爐峰香氣烟
霞共遠智者經託勝地為在總內令為檀越誠深隨喜
更追厚愧善當敬勗楊廣和南

三月二十一日

與禪閣寺書

春序將謝道體何如僧衆清善匡山佛事興自慧遠法

師法師師於彌天道安安師於佛圖澄妙德相承莫之
為最江東龍藏悉本雁門雁門上人創迹廬阜自梁及
晉止有東林陳晚澆漓別生禪閣僧徒好異豈稱至和
智者爰居還須合一想均願海更無異味行人將送過
指此相聞楊廣和南三月二十一日

入朝遣使叅書

弟子總持和南仰違移歲馳誠載勞無事入朝彌增延
屬武關雖阻荆近於吳是以暫停陝州遣使承接行人

返命具奉覲縷非惟年尊疾動又以結夏安居理事相
推固須停止弟子還鎮非久便願沿流仰會江都庶應
旦夕將聖德果亦復差機因緣多端請不勞慮謹和南

九月
十日

又

弟子總持和南僧使智遠來奉五月二日誨用慰馳結
仰承衡嶽功德圓滿便致荆巫屢涉虧和深以傾悚弟
子於江都入朝至陝闕眩瞀停岐陽腹內又不調適去

月末還京輦如欲相承猶自羸弱未即祇覲望雲延願
珍納行人今返辭豈宣具謹和南

又

顥遣智遠奉書上玉泉伽藍圖并求南
衡禪師碑因獻萬春樹皮袈裟王答書

弟子總持和南奉旨於荊州當陽縣境玉泉山陲為建
造伽藍招提行道圖寫地形具以賜示伏以布金徧地
買園建立奉置三尊永流萬代唱誦所不能讚算數所
不能量孰意輕微頓蒙創造循復來旨爽然失厝既事
出神心理生望表無容違拒苟作形迹即具聞奏嘉號

乃覃名符天冠道場聲滿恒沙世界福報仰歸遜辭難
涉謹和南

又

弟子總持和南垂肯令撰衡嶽禪師碑文郭有道之無愧辭高德逾此陸士衡之披文相質弟子多慙既蒙獎成不無勉勵邯鄲絕妙深恐難工還鎮病瘳庶或勉強循覽行狀用難思議佛澄道安寧復過是謹和南

又

弟子總持和南垂賜萬春樹皮袈裟一緣述是梁武帝時外國惟獻四領今餘一而是建初烏瓊法師所披謹尋菩薩戒稱所著袈裟皆染使壞色況復自然嘉樹妙彩天成相應之言無勞外假萬春表長生之稱二翼合善譬之辭永服周旋恒充布薩常事半月豈惟元日著如來衣深荷慈獎謹和南

又

弟子總持和南率施別牒五彩旛錦香爐檀等十種示

表微誠薄申法覘渺陋追悚謹和南

五色四寸九尺旛
二張五色斑羅經

巾二枚絹五十疋錦香爐檀十張熏陸香二筋刺刀十

口鵝納袈裟一領油鐵鉢十口雄黃七斤青須彌甃五

領右牒

遣使荊州迎書

開皇十三年二月王入朝
行次陝州遣書荊州迎顚

弟子總持和南暄和道體勝愈仰揆衡嶽法事久當圓滿江陵功德復應成就隨喜之至難用勝言弟子今入朝覲行次陝州馳仰之誠與時而積故遣使人迎候希

便進道來月下旬惟遲祇接路首息促豈復委宣謹和

南

二月二

十二日

遣使潭州迎書

弟子總持和南歲聿云暮寒氣殊重禪悅經行願常安
樂弟子頃來每多勞疾但睽覲稍久惟用傾結仰度所
營功德已當究竟今遣左親使伏達奉迎願便事沿流

延遲諸具謹和南

十二月
初五日

在京遣書

弟子總持和南仰違已久馳係實深獻歲非遙傾遲虔
禮暮春屆節當遣奉候謹和南

九月二十四日

在京重遣書

弟子總持和南適逮近旨用慰馳情春暄願道體康勝
玉泉創立道場嚴整禪衆歸集靜慧日新隨喜之深難
以辭諭弟子始服三石散竟調息勞心秋仲歸蕃請夏
訖沿下在干拜覲差當匪奢其間珍德今遣統軍魯子
譽往祇承謹和南

從駕東岱於路遣書

弟子總持和南仲秋轉冷仰惟道體康愈弟子即日粗可行未由虔禮但增延結願珍德謹遣修承謹和南

於路次書

弟子總持和南寒氣漸嚴仰惟康愈動寂怡神興居安悅弟子陪奉鑾駕旅次長奉遠憑勝力行往安隱瞻言祇覲庶或匪遙願珍重此不宣具謹和南

十月九日

還藩遣迎書

開皇十五年春晉王久留京師將還鎮遣使
奉迎顓乘流東下止揚州禪衆寺王奉書求
學禪慧顓書答之後三日王復重
請乃以所著淨名義疏初卷奉王

弟子總持和南獻歲春明仰惟道體勝豫禪悅法喜衆
咸集業功歸有在悉由明導敬憶江東暫欲西上先到
衡嶽用賽師恩次往渚宮以報生處虔承此旨衛送大
江揚子臨流具申來請即蒙開許還至觀濤年來歲往
寒暑屢變恭聞功德圓滿遠難讚述弟子多幸生在佛
家過庭所聞匪直詩禮轉輪斯奉實惟旦暮今者陪扈

鑾駕輦發自京師言停洛陽又止歷下柴望之禮本自
虞書巡會之聲盛於姬典至尊憲章先古允叶人神相
風指南奉朝東岱以今月十一日吉辰宗事云畢於時
天地載廓日月增華休氣神光燭近被遠靈芝龍吐山
谷連木竝秀宮壇瘞聾夔之徒無醫而自愈扶老攜
幼之侶不謀而同到臣子殫見事非虛飾一物得所萬
里斯應師資至重敢不稍聞第率從便蕃即辭行所夾
鐘將未必屆揚州今遣奉迎便願沿下餘春未盡必希

拜觀其間珍德續復祇承謹和南

正月二
十日

謝天冠仍請淨名義書

總持和南前揆菩薩天冠率爾式之樣深嫌不工即用
呈簡爰逮今製思出神衿圖比目連妙逾郢匠開士
五明此居其一金剛種智茲焉標萬是知因地化物不
可思議接引隨方多能盡達冠尊于身端嚴稱首跪承
頂戴覽鏡裴徊有飾陋容增華改觀弟子多幸謬稟師
資無量劫來悉憑開悟色心無作觸仰勝緣度脫舟航何

慮不累但戒為基趾信實行先保解毗尼昔年虔受身
雖疎漏心護明珠而定品禪枝屏散歸靜猥以凡薄荷
國鎮蕃為子為臣難虧難怠豈藉四緣能入三昧此非
臆斷實荷誠說經稱非禪不智非智不禪定解相資能
證無漏又電光斷結其例甚多慧解脫人厥朋不少即
日欲服膺智斷率先名教永汎法流兼同治國未知底
滯可開化不師嚴道尊可降意不宿世根淺可發萌不
菩薩應機可逗時不若未堪敷化且暫息緣如可津梁

便開祕藏書云民生在三事之如一況覃釋典而不從
師今之慊言備憑素款成就事重請棄飾辭謹和南

六月

二十
一日

重與智者請義書

弟子總持和南仰逮還旨猶秉謙尊循復久之悅如自
失切以學貴承師事推物論歷求法緣厝心有在若習
毗曇則滯有情著若修三論又入空過甚成實雖復兼
舉猶帶小乘釋論地持但通一經之旨如使次第徧修

僧家尚難盡備況居俗而欲兼善當今數論法師無過
此地但恨不因禪發多起闕心達者無違求那明偈仰

惟厚習善根非一生得初乃由學俄逢聖境南嶽禪師
親所記蔚說法第一無以仰過照禪師來具述此事於
時心喜已域寸誠智者昔入陳朝彼國明式瓦官大集
衆論鋒起榮公強口先被折角兩瓊繼軌裁獲交綏忍
師讚歎惟唱希有弟子仰延之始便事勝集屈登無畏
釋難如流親所聽聞衆咸瞻仰適承前往荆楚講法華

經舊學名僧莫不歸服故知非禪不智驗乎金口比聞
名僧所說智者融會盡有階差譬若羣流歸乎大海此
之包舉始得佛意弟子即日而不依請譬彼彌勒今當
問誰惟願未得令得未度令度樂說無窮法施無盡復
使顧言稽首虔拜謹和南

六月二
十五日

謝義疏書

弟子總持和南逮肯送初卷義疏跪承法寶粗覽綱宗
悉檀內外耳未曾聞故知龍樹代佛不可思議今所著

述肉眼未覩明闇謹復研尋遲此觀接謹和南

論荊州諸寺書

顥以荊州立玉泉及所修十住寺請王為檀
越王即移書達荊州總管嘗令檢校復致書
勸留顥

後答書

弟子總持和南荊州玉泉十住兩寺近既賜令檢校令
須書及江陵總管當勒所由終聽僧使奢促弟子仰蒙
淨戒宿世因緣稍希義理智波羅密爰降開許始制義
疏方憑沃啓向入慧門昔年仰請棲霞時往觀行政為

密邇朝發暮到應可諮詢不異邑居行道本貴安寧
勞過遠天台之路幸願輶情屈已為人菩薩有賜于專
契弗敢違前都不知淨人善心已墮僧數濟度無隔惟
用隨喜謹和南七月二十七日

復答智者書

總持和南復垂誨旨益具仁慈開士虛懷隨感必應本
誓願力何患不果政言服道日淺未堪違遠深憑護念
開示悟入玉泉十住天台本居仰由勝功能得建立方

須影響永至金剛江陵書及會稽教下竝勅所司以時

發遣謹和南

七月二十九日

與荊州總管達奚儒書

智者禪師德尊望重近年紓道爰授淨戒今修治彼州
十住寺造立西祖玉泉寺竝見請為檀越復聞公等多
結勝緣大乘運通良深隨喜師今遣僧使志果法才二
人還就玉泉寺法燦道慧法師十住寺道臻法師經理
想加心影響獎成妙業公弘覃福幽顯同賴法事遠白

不復暄涼也楊廣白

八月二日

迎智者入城礙雨移日書

總持和南方要仰延雨乃暫阻明間若晴別當遣信謹

和南

七月二十六日

次迎入城書

總持和南霜寒道體康勝弟子還來甫爾未暇迎延馳
誠已深今遣候接翼近祇覲謹和南

九月十六日

答智顗蔣州事書

弟子總持和南爰逮高旨騰蔣州僧所及竊以僧居望
利食惟分衛所立精舍本依聚落近年奉詔專征弔民
伐罪江東混一海內乂寧塔安其堵市不易業斯亦智
者備所明見而亡殷頑民不慙懷土有苗恃險敢恣蝗
蝻橫使寺塔焚燒如比屋流散鐘梵輟響雞犬不聞廢
寺同於火宅持鉢畧成空返僧衆無依實可傷歎彼地
福盡方成丘墟所餘堂塔本不壞毀其有現僧亦許房
住惟虛廊檐宇會當倒壓所以移來還充寺館其外椽

版權借築城若空寺步廊有完全者亦貸為府廨須一
二年間民力展息即於上江結筏以新酬故本勅所司
具條孔目無慮零漏恐遠僧未能曲見頓用仰誣必願
言提寘諸其掌猥延滿軋戀惻良深謹和南

遣使入天台參書

總持和南麥序氣清道體和適福慧莊嚴與時高勝弟
子至來未久麤復可行近頻降兩書爰垂示功德玄義
刪削文句入初其舊維新從龐至妙會須披接方豁煙

雲春律已謝夏坐方結敢違經教涉暑出迎白露宵團

秋風葉下必預舟楫迎觀江陽然仰勞著述已涉數載

般若多障近願成功日就月將庶方啓沃率貢別牒示

表虔誠在敬無文仰揆弘亮其間珍德續事音語謹和

南

納袈裟十領龍鬚席二枚須彌檀
二領猫牛酥三瓶薰陸香一合

遣使入天台迎書

總持和南霜氣已緊蚊熱久祛方恐洞汎預取調適今

遣奉迎祇禮非奢謹和南

九月二

遣使叅病書

開皇十七年王使入山迎顥行次石城乃稱有疾遣醫往治或請進藥及齋並不聽

總持和南仰承出天台已次到剡石城寺感患未歇菩薩示疾在疚亦愈但於翹誠交用悚灼今遣醫李膺往處治少得康損願徐進路遲禮覲無遠謹和南

答智顥遺旨書

菩薩戒弟子總持稽首和南先師天台智者內弟子灌頂普明至奉去十七年十一月二十一日遺書七紙手

迹四十六字并淨名義疏三十一卷犀角如意蓮華香
爐等跪對修讀摧振干心舍利儼然德音具在迦葉狼
迹身證遙追曇光天台安禪近躡誠復如來雙林四部
號慟而涅槃遺教法更殷重況乎五百歲後四依拯溺
深順佛旨居世同凡將欲泥洹現希有事五品十信已
自皎然彌陀觀音親來接引去德茲永乃增悲戀追悟
今生還慶夙稟所恨淨名經疏不重親承由冀尋研用
補咎悔追惟障惱現機未發逖聽前聞亦有成就非徒

悟有淺深抑又時或早晚佛滅度後得聖巨多道躍他
方冥來曉示在思即世忽奉大師良由宿緣積曾親近
愛覃來命必垂影響不捨本誓筆迹具存是用歸誠憑
靈戒懇跪受經疏如意香爐虔禮西方心口相誓手探
卷軸最後殷勤即於今月十八日仍感瑞夢是知濟度
已降舟航惟願即日在寶池遙開蓮華今居淨域近溉
濁心世世生生師資不闕革凡登聖給侍無虧但義府
鈎深遺文淵博雖加策駘終畏面牆特希溉以醍醐如

出香乳照以暗井即顯真金然後仰藉神通俯勵精力
別詢名僧奉揚法味普共含生作大利益斯則弗違提
獎同登彼岸最勝最上就此為尊灌頂所送最後淨名
義疏三十一卷至佛道品謹即裝治善書習讀逮旨爾
前玄義及人文解釋付弟子焚之即付還使遣對燒蕩
犀角如意蓮華香爐遠以垂別輒當服之無斁永充法
事今奉施甕瓦香爐供養龕室遺旨以天台山下遇得
一處非常之好垂為造寺始得開翦林木位置基階今

遣司馬王弘創建伽藍一遵指畫寺須公額并立嘉名
亦不違旨佛龕頭施竝各仍舊使移荊州玉泉十僧守
天台者今山內現前之衆多是諸宮之人已皆約勒不
使張散豈直十僧而已所求廢寺水田以充基業亦勑
王弘施肥田良地深蒙擁護當年別資給行送經一藏
依法為先師別供養具鐘幡香等又施錢直且充日費
鄖境靈塔吳內石像劍縣彌勒尊儀卧疾之處竝使裝
飾亦不仰異荊州玉泉寺既是為造理當異餘道場其

潭州大明寺荊州十住上明寺等先以敬許為檀越無
容復乖今誨使製南嶽師碑即命開府學士柳顧言為
序自撰銘頌所囑僧有罪治無罪平等切以涅槃羯磨
經有誠文正論治國金光明品住持三寶弗敢墜失又
令加修慈心撫育民庶大馬識養人豈忘恩蓋聞外書
為教仁尚恕物內典居宗大慈為首在文雖異諸理實
同不有君子其能為國不有菩薩豈濟含生又以僧未
貫籍許其出首適奉詔書冥符來及見機而作所謂後

天而奉天時糧運轉輸深闢軍國前已表聞所司未報
終當方便必期諧果及承寄囑斯復能照他心前來仰
答無違意旨庶藉熏修福祐國家灌頂普明面引詢訪
具述遺形宴坐宛若平生轉恨失時不重餐義味仰揆
定力如須彌峙法臘云竟切願輿迎一到江陽還入禪
衆道俗接足人神頂禮即當奉送復彼山龕庶藉瞻仰
能開心目深願道力不孤所請雖厚恩申報具在願文
而實宜加護實須酬仰二僧今反輕奉報書遠拜靈儀

心載嗚咽謹和南

開皇十八年
正月廿二日

智顥終後弔山衆書

正月二十九日總持和南白諸行無常是生滅法諸佛及緣覺尚捨無常身大師智者移應遷神哀摧抽惱不能自勝念當戀慕追慟難忍永矣奈何當復奈何侍者灌頂普明二人賚送別書觀心論淨名疏犀角如意蓮華香爐并智越法師一衆啓見對增哽德音若存即遣條流移神靈迹祥瑞炳著自述分明舍利全身于今安

生非證聲聞小果定入菩薩大位素聞得法華三昧方
驗不退法輪面覩彌陀觀音大勢至以宿命智反照斯
土四部弟子豈不努力自揆寡薄無以申報唯當敬依
付囑不敢弭忘應建伽藍指畫區域須達引繩天宮即
應至金剛際既有要道當建繕造一遵本意昔宣尼亡
沒弟子守墓三年子貢之徒乃至六載況乎方置精舍
永樹福基彼現前僧慎勿張散但使謀道何患無食期
取來生西方非遠必若懈退寶池極遙今遣使人於佛

龍峯頂虔誠懾禮修福建齋具如願文畧伸鄙意二僧

今返特此慰書楊廣白

十一月五日

遣使入天台設周忌書

王遺典籤吳景賢入山
以諱日設五百衆齋

歲序推移日月如逝智者遷化已將一周追深悲痛情

不能已念慕感慟何堪自居今遣典籤吳景賢往彼設

齋奉為亡日追福遲知一二楊廣和南

開皇十八年

賜釋慧覺書

法師安善涼暑惟宜承栖遲龜山之域闡揚龍樹之旨
其義端雄辯獨演暢於稽陰談柄微言偏引汲於鏡水
弟子欽風籍甚味道尤深今於城內建慧日道場延屈
龍象大弘佛事盛轉法輪上人名稱普聞衆所知識今
遣迎候遲能光拂也

請釋灌頂書

夏序炎赫道體休宜禪悅資神故多佳致近令慧自道
場莊論二師講淨名經全用智者義疏判釋經文禪師

既是大師高足法門委寄今遣延屈必希需然并法華
經疏隨使入京也佇遲來儀書不盡意

召徐則書

則東海剡人陳時隱天台山絕穀養性惟資
松朮初在縉雲山太極真人徐君降之曰汝
年出八十當為王者師然後得道也晉王廣
鎮揚州知其名手書召之則謂門人曰吾今
年八十一王來召我徐君
之旨信而有徵遂詣揚州

夫道得衆妙法體自然包涵二儀混成萬物人能弘道
道不虛行先生履德養空宗玄齊物深明義味曉達法

門悅性冲玄怡神虛白餐松餌朮栖息煙霞望赤城而
待風雲游玉堂而駕龍鳳雖復藏名台巖猶且騰實江
淮籍甚嘉猷有勞宿寐欽承素道久積虛襟側席幽人
夢想巖穴霜風已冷海氣將寒偃息茂林道體休念昔
商山四皓輕舉漢庭淮南八公來儀藩邸古今雖異山
谷不殊市朝之隱前賢已說導凡述聖非先生而誰故
遣使人往彼延請想無勞束帛責然來思不待蒲輪去
彼空谷希能屈已佇望披雲

徐則沒後下書

徐則詣揚州晉王請受道法辭以時日不便
其後夕中命侍者取香火如平常朝禮之儀
至五更死支體柔弱如生停留數旬顏色不
變王下書送還天台定葬時在道多見則徒
步云得放還比至舊居取經書道法分遺弟子
跨石梁去不知所之須臾柩至方知其靈化

天台真隱東海徐先生虛確居宗冲玄成德齊物處外
檢行安身草褐蒲衣餐松餌朮棲隱靈岳五十餘年卓
矣仙才飄然勝氣千尋萬頃莫測其涯寡人欽承道風
久餐德素頻遣使乎遠此延屈冀得虔受上法式建良

緣至止甫爾未淹旬日厭塵羽化反真靈府身體柔軟
顏色不變經方所謂屍解地仙者哉誠復師禮未申而
心許有在雖忘怛化猶愴於懷喪事所資隨須供給霓
裳羽蓋既且騰雲空樽餘衣詎藉墳壘但杖舄猶存示
同俗法宜遣使人送還天台定葬

文

寶臺經藏願文

菩薩戒弟子楊廣和南仰惟如來應世聲教被物懸懃

微密結集法藏帝釋輪王既被付屬菩薩聲聞得揚大
化度脫無量以迄于今至尊拯溺百王混一四海平陳
之日道俗無虧而東南愚民餘燐相煽爰受廟畧重清
海濱役不勞師以時寧復深慮靈像尊經多同焜燭結
鬘繩墨湮滅溝渠是以遠命衆軍隨方收聚未及朞月
輕舟總至乃命學司依名次錄并延道場義府覃思澄
明所由用意推比多得本類莊嚴修葺其舊惟新寶臺
四藏將十萬軸因發弘誓永事流通仍書願文悉連卷

後頻屬朝覲著功始畢今止寶臺正藏親躬受持其次
藏已下則慧日法靈道場日嚴弘善靈刹此外京都寺
塔諸方精舍而梵宮互有小大僧徒亦各衆寡竝隨經
部多少斟酌分付授者既其懇至受者亦宜殷重長存
法本遠布達磨必欲傳文來入寺寫勿使零落兩失無
作前佛後佛諒同金口即教當教寧殊玉牒須彌山上
衆聖共持金剛海底天龍盡護散在閻浮亦復如是追
念繕寫之者厥誠至隆心手勤到何量功德捨撤淨財

豈可稱計所資甘雨用沃焦芽能生是佛本是般若人
能弘法非道弘人恕已深恩即是自為今陳此意乃似
執著若不開警則不深固自行化他備在經律顧循非
識誠媿通方因果相推何殊眼見豈不知獨善且最勝
無為第一樂內典法奧自闢衆僧何事區區橫相負荷
但慶憑宿植生長王宮謁陞趨庭勗存遠大出受藩寄
每用祇兢非惟禮樂政刑一遵成旨而舟航運出彌奉
弗墜無容棄稷禹而同園綺變菩薩而作聲聞越用乖

方既其不可篤信受付竊敢當仁然五種法師俱得六
根清淨而如說修行涅槃最近徒守經律不依佛戒口
便說空心滯於有無上醫王隨病逗藥開乳舍酥為方
既異甜冷苦熱取療亦殊譬前後教門別赴機性根莖
枝葉受潤終齊總會津梁無不入道猶如問孝問仁孔
酬難別治身治國老意無乖殊途同歸一致百慮内外
相融義同混合何處有學毘曇而不成聖執黎耶即能
悟真師子嚴鎧反貼毀於羸目象足至底翻取謂於蜂

房心同劖戟諍踰水火經意論意都不如斯通經通論
何因若此恩施甘露更成毒藥儻均味海則致醍醐聖
御紺寶天飛金輪雲動納萬善於仁壽總一乘於普會
開發含識濟度羣生今所傳經遍于宇內衆聖潛力必
運他方共登菩提早證常樂則是弟子之伸順弘誓於
無窮平等坦然通達唱白達識體之念隨喜也

誄

泰孝王誄

維開皇二十年六月二十日丁丑上柱國秦孝王薨於仁壽宮嗚呼哀哉八元八凱濟濟虞則周南召南赫赫周國於穆孝王紹彼明德天寶喪予殯我剛克嗚呼哀哉如何上靈降此灾否國喪宗臣家亡千里嗚呼哀哉爰初不豫冕旒視疾及至大漸停鑾駐驛親臨屬纊俯觀徹瑟哀動皇情痛深慈膝一辭明世千秋長幕如何綿綿終古仲秋卜宅將歸泉戶梁山之陽永寧后土嗚呼哀哉余寡兄弟愛篤彌深奄然零落痛體傷心嗚呼

哀哉追悼無及永分古今神雖虛翳一作神徽聲靡替
誅王德音貽千百世乃作誄曰

皇隋啓運應天順民保茲七百靜彼四隣利建宗子藩
屏懿親孝王惟允俾侯于秦爰自聖章天性誠愿色養
蒸蒸孝立名建恭近於禮恥辱斯遠嘉之弗忘懼而無
怨孝弟之至通於神明溫溫居德肅肅勵精恭敬表志
退讓為情辭此棠棣敦斯鵠鵠仲稱令弟叔曰仁兄猗
歟我弟好學無替九流日修三餘卒歲琴臺夜開書帷

畫閉聰敏若神雄辯無滯妙矣聲律明哉龜筮玄象風
角於焉及睿允文允武多才多藝惟善惟樂為仁為惠
天挺出羣英圖命世欽若孝王容止堂堂振鶩將集鳳
雛斯翔人之領袖國之輝光輝光伊何肅肅翼翼義以
處身仁以經國明燭繁符財成淵塞靖恭爾位好是正
直令聞令望無反無側皇枝良幹日富英聲宣風作伯
盤石維城東京舊都河南殷博惟我哲王行臺惟冥飛
轡靖函褰帳伊洛德被汝墳仁行鞏臺西秦右地實賴

英雄寔惟王化一作匪他乃即龜蒙惠和布澤易俗移風亹

一作匪他

藩入侍天軒典茲戎衛仍居納言寶劍橫曜豐貂尤溫

周衛清切敷奏便繁獻替惟允禁旅斯敦偽陳不恭軼
我炎鄙王赫斯振將清江涘圖斯元帥難全其備唯我

孝王膺茲無愧恭行天罰受賑建旗申威鄂渚鞠旅江

渭軍容赳赳邇一作纍纍雲陳不布高城靡持泥首

銜璧請命于台兵不血刃野無橫屍善戰不陣我弟於茲金陵戡定飲至京師廣陵淮海一都之會牧彼頑民作相干外時雨隨車棠陰逐蓋惟晉太原寄隆望大表裏山河要衝襟帶東自楊越迴旌轉旆善政廉平於斯為最敵人畏威氓黎荷賴烽火戎馬俱清邊界寒暑失御庸衛弗開言旋京邸去彼叢臺扈駕仁壽撫席巖隈連綿藥餌歲去年來秀而不實禍極生災天胡不弔木壞山頽嗚呼哀哉至尊廢朝而悼傷皇后輟膳而摧痛

甚秦國之永辭劇梁武之長送昆弟哀哀而日嗟僚友
歎歎而悲慟嗚呼哀哉歎日月之不居何卜遠之詎促
旌旄飄颻而從風笳管酸嘶而響谷服馬顧而不能行
挽夫悲而不成曲霜霰落兮山谷寒木葉下兮丘壘殘
風颶颶而吟樹泉幽咽而悲湍離羣之獸絕跡孤飛之
鳥悲酸背離宮而東轉厯山邸而北度去甲第之樓臺
即荒田之丘墓昔時鳴鑾而戒途今日靈輶而啓路臨
朝謁之平衢永絕茲之一步儻若神而有靈幾悲傷而

留顧嗚呼哀哉去永日之昭昭襲長夜之悠悠苦玄局
而無曉悲黃泉而永幽涇盛年於萬古徂壯志於千秋
嗚呼哀哉慟反哭於秋季悲復歸於故地伊形遊而不
遷何魂斂之空志嗚呼哀哉酒樽浮塵兮獨滿琴絃含
風兮自斷冥夜久其何期焉知歲月之長短孝王與我
體密情親孔懷之篤有踰常倫昊天何酷哀哉哲人奈
何吾弟先我長淪煩冤痛毒悲恨何陳嗚呼哀哉痛母
弟之同胞棄共被之寒郊豈止三荆之變色非惟四鳥

之分巢遽一朝而云逝曷何去而何止形未捨目言猶
在耳彼蒼者天子何甚矣嬛嬛一作憮憮友于哀哀吾予痛

當奈何痛當何已想鬟鬢而不見猶盤桓而佇立空撫
膺而莫追抑飲淚而何及嗚呼哀哉嗟地久而天長終
淪彼乎幽方徒春華而秋落不復見我弟兮孝王何謝
安之蔬食豈予路之喪亡獨端憂而誰告徒哽塞而追
傷悲莫悲兮長別痛莫痛兮終絕因悽愴以寫情慟人
琴而永訣嗚呼哀哉

疏

受菩薩戒疏

使持節上柱國太尉揚州總管諸軍事揚州刺史晉王
弟子楊廣稽首奉請十方三世諸佛本師釋迦如來當
降此土補處彌勒一切尊經無量法寶初心以上金剛
以降諸尊大權摩訶薩埵辟支緣覺獨明悟二十七
賢聖他心道眼乃至三有最頂十八梵王六欲天子帝
釋天主四天大王天仙龍神輩騰隱顯任持世界作大

利益守塔衛法防身護命護淨戒無量善神咸願一念
之頃承佛神力俱會道場證明弟子誓願攝受弟子功
德竊以識暗萌興即如來性無明俯墜本有未彰理數
斯歸物極則反欲顯當果必積于因是調御世雄備歷
生死草木為籌不可勝計恒沙集起固難思議深染塵
勞方能厭離法王啟運本化菩薩譬如日出先照高山
隨逗根宜權為方便如彼衆流咸宗大海弟子基承積
善生在皇家庭訓早趨貽教夙漸福理攸鍾妙機須悟

恥崎嶇於小逕希優游於大乘笑止息於化城誓舟航
於彼岸但開士萬行戒善為先菩薩十受專持最上喻
造宮室必因基址徒架虛空終不成立弗揆庸慾抑又
聞之孔老釋門咸資鎔鑄不有軌儀吾將安仰誠復釋
迦能仁本為和尚文殊師利冥作闍黎而必藉人師顯
傳聖授自近之遠感而遂通薩陁波崙聲體於無竭善
財童子忘身於法界經有明文敢為臆說深信佛語聿
遵明導天台智顓禪師佛法龍象童真出家戒珠圓淨

年將耳順定水淵澄因靜發慧安無礙辨先物後已謙
挹盛風名稱普聞衆所知識弟子所以虔誠遙注命懺
遠延每畏緣差值諸留難亦既至止心路豁然及披雲
雲即銷煩惱謹以今開皇十一年十一月二十三日總
管金城設千僧蔬飯敬屈禪師受菩薩戒戒名為孝亦
名制止方便智度歸親奉極以此勝福奉資至尊皇后
作大莊嚴同如來慈普諸佛愛等視四生猶如一子弟
予即日種羅瞻業生生世世還生佛家如日月燈明之

八王子如大通智勝十六沙彌眷屬因緣法成等侶俱
出有流到無為地平均六度恬和四等衆生無盡度脫
不窮結僧那於始心終大悲以赴難博遠如法界究竟
若虛空具足成就皆滿願海揚廣和南

天台建功德發願疏

菩薩戒弟子總持和南十方三世諸佛一切尊法三乘
聖衆上界天仙龍神他心道眼護持應現塞虛空無
量幽顯切聞諸佛菩薩不捨本誓為天人師拔濟含識

次令和南闍黎代作宗範引接後來與佛無異資敬之
重具在經律不有明導豈濟苦海匪報厚德豈收福田
遺行可追謹依佛語菩薩戒先師天台智者來踰剡嶺
遷化石城初開訊至哀情推動敬惟勝行逾滿熙連佛
許臨終自說所得今開侍者所書巨有異相稱吾位居
五品弟子事在法華十住信心文具瓔珞於是空聲異
響徧滿山房索披大衣云觀音來至驗知入決定聚面
覩彌陀靜攝遷神安坐身證久移晦朔容相儼然斯蓋

無量劫來檀慧具足深護佛法發起羣生非無顯晦出
沒其孰能於此歟有始有終者其惟聖人乎設以辯才
千萬偈讚師福慧終不能盡夏初遣信到山期法歲竟
迎接僧臘既滿尚疑谿谷毒厲意取氣交霜雪杯度鏡
水及届刹下便承卧疴豈言信次騰神淨域遂不獲重
音容再諳法味維摩義疏蘊而莫宣良由宿障根深致
違心契已悔於前須補於後近於此州禪衆舊居雖仰
為設會并就天台指畫之地則造寺塔而於彼山頭陀

之處未獲重修今竊覽別書囑寄佛法不思議事感歎
銘衿無已之誠今遣往於佛隴峯頂集衆結齋願承三
寶之力速達西方智者證知淨土記弱生生世世長為
大師弟子未得佛前早相度脫不棄緣感弘到菩提并
乞衆力為弟子懺悔自從無明住地以來至于今日恒
沙惑障煩惱迷昏五蓋十纏輪迴界內八萬四千塵勞
增長願憑積慶及茲功德衆罪霜露慧日消除衆善普
會法雨洋溢神通道力照藹皇家寶祚靈長覃被億兆

開皇十八年正月二十九日

敬靈龕疏

維隋仁壽元年歲次辛酉十二月十七日庚寅菩薩戒弟子皇太子總持和南敬告天台山寺先師智者全身舍利靈龕之座粵竊聞民生在三事之如一皆資聖範能遂賢功顏回不值宣尼豈隣殆庶尹喜不逢老氏安致長齡況乎乘般若之舟望菩薩之岸弗有明導豈至寶所復因信俱次法城所謂自利利他人我兼利師及

弟子智斷具足抑又聞曰疎傳告老太子贈以黃金桓
師退辭家庭陳於喪服斯竝有為方內少用報恩豈臻
無際空表盡酬師力弟子宿植德本早承道教身戒心
慧蒙瑩明珠旱穗寒茭盡沾甘露雖復時流歲永生滅
不追行住坐卧服膺如在爰以景昧謬齒元良守器非
才昇離多懼復奉明詔曩經作伯暫輟監撫還省宸方
瞻望天台有如地踊僧使續來龕瑞重疊多寶妙塔如
意分身玉毫金光分宵破暗應念彈指自室空聲有一

於此已稱靈顯四者難并豈非希有自曇光坐滅之後
道猷身證以來興公飛錫所不能稱靈運山居未有斯
事盛矣哉是我大師證道之基趾也至矣哉是我良田
之報歲也詩云無言不酬無德不報經稱知恩報恩諸
佛皆爾近歲雖遵誠約修構祇洹多慚布金止因山宇
庶同心淨域勝土莊嚴幸僧衆無虧熏修不缺冥力深
扶人功多愧今遣員外散騎侍郎兼通事舍人張乾威
送僧使灌頂等還山於寺設會稽首接足十方三世一

切三寶無量幽顯現前大眾以此功德仰資先師智者
早證正覺具如臨終證現以生安養頃來留瑞久現彌
陀踵武觀音連衡大勢回眸東視不捨娑婆轉睇南閻
彌憐震旦滄溟巨海尚不讓於涓流嵩華峻極安荀排
於微塙敢陳薄供願垂攝受當使無邊法身盡承甘露
無量化影咸進醍醐盤餐之不可窮般若味之不可
竭盡我念力遵我師道消我煩惱滿我誓願現在未來
長慧提拔家國眷屬俱入大乘密往潛來恒垂影響塵

勞障累消除隱塞究竟等虛空圓滿如法界斯則大師
勝力諸佛荷擔弟子含慈出如來藏無離文字以求解
脫文字之性即解脫也不着世間如蓮華常善入於空
寂行達諸法相無罣礙稽首如空不可依

設齋願疏

菩薩戒弟子皇太子總持和南十方三世法佛報佛應
佛法身應身化身諸佛所師所謂法也以法常故諸佛
亦常佛常法常比丘僧常世間皆空而實不空諸佛妙

有而實不有不有而有不空而空至寂恬然始名至樂
凡情弊報皆生極苦迷之者則生盲皓首得之者則固
象玄珠弟子幸憑勝緣微因宿種方便智度生在佛家
至尊皇后慈仁胎教有八王子日月燈明之恩十六沙
彌大通智勝之勗加以昔蒞淮海欽尚釋門先師天台
智者顓禪師膺請江都授菩薩戒由是開悟歸憑有在
而夢楹託諷梁木先頽合掌安禪端坐示滅于今數載
儼然若思適現儀形續放光燄彈指之聲震于龕室僧

僧報述遐邇聳踊皆由佛法僧力感應相關汲引含靈
故現斯瑞肅奉明詔暫輶監國巡慰淮揚銜籲毗黎恩
報佛恩少酬師道以今大隋仁壽元年歲次辛酉十二
月十七日謹遣員外散騎侍郎通事舍人張乾威到天
台山寺敬設蔬飯雖調八水多慚百味庶同純陀之末
供有如淨名之遙請色香細軟偏滿十方歡喜甘餐寧
唯百億天仙龍神竝希雲布任持世界盡望星羅以智
者之分身納師資之攝受經稱信為能入智為能度願

消甘露咸濟苦海應變穢土通同淨國天覆地載長轉
金輪七廟六宗永安玉座本支百世紹隆萬紀男女繙
素皆染大乘水陸空行咸知佛性須彌入於芥子未足
成難食頃猶如巨刦曷以為怪井蛙不識江海蚊睫安
知鵬翼以我今懺竝乞永消以我今誠皆入願海發菩
提心徧在諸物菩提心者即是佛心下度衆生上求佛
果不可以身得不可以心得以無所得即菩提心無所
得即是得無所得稽首歸命十方三寶

樂府

飲馬長城窟行示從征羣臣

以下五言

蕭蕭秋風起悠悠行萬里萬里何所行橫漠築長城豈
台小子智先聖之所營樹茲萬世策安此億兆生詎敢
憚焦思高枕於上京兩河東武節千里捲戎旌山川互
出沒原野窮超忽擬金止行陣鳴鼓興士卒千乘萬騎
動飲馬長城窟秋昏塞外雲霧暗關山月緣巖驛馬上
乘空烟火發借問長城候單于入朝謁濁氣靜天山晨

光照高闕釋兵仍振旅要荒事方舉飲至告言旋功歸

清廟前

白馬篇

文苑英華作煬帝樂府作孔稚圭案詩中多
叙征遼之事當以英華為正稚圭別有二篇

白馬金貝裝橫行遼水傍問是誰家子宿衛羽林郎文
犀六屬鎧寶劍七星光山虛弓響徹地迴角聲長宛河
推勇氣隴蜀擅威強輸臺受降虜高闕剪名王射熊入
飛觀校獵下長楊英名欺衛霍智策蔑平良鳥夷時失

禮卉服犯邊疆徵兵集薊北輕騎出漁陽進軍隨日暉
挑戰逐星芒陣移龍勢動營開虎翼張衝冠入死地攘

臂越金湯塵飛戰鼓急風交征旆揚轉鬪平華地追奔

掃鬼方本持身許國況復武功彰會令千載後流譽滿

旂常

步虛詞二首

洞府凝玄液靈山體自然俯臨滄海島回出大羅天八
行分寶樹十丈散芳蓮懸居燭日月天步役風烟躡記

書金簡乘空誦玉篇冠法二儀立珮帶五星連瓊軒
解甘露瑜井挹膏泉南巢息雲馬東海戲桑田回旗遊八
極飛輪入九玄高蹈虛無外天地乃齊年

總轡行無極相推凌太虛翠霞承鳳輦碧霧翼龍輿輕
舉金臺上高會玉林墟朝遊度圓海夕宴下方諸

春江花月夜二首

晉書樂志曰春江花月夜玉樹後庭花并陳
後主所作後主常與宮中女學士及朝臣相
和為詩太常令何胥又善文
詠採其尤艷麗者以為此曲

暮江平不動春花滿正開流波將月去潮水帶

玉臺作共

星

來

夜露含花氣春潭養月暉漢水逢遊女湘川值兩妃

錦石擣流黃二首

漢使出燕然愁閨夜不眠易製殘燈下鳴砧秋月前
今夜長城下雲昏月應暗誰見倡樓前心悲不成搨

喜春遊歌二首

禁苑百花新佳期遊上春輕身趙皇后歌曲李夫人

步緩知無力臉曼動餘嬌錦袖淮南舞寶袜楚宮腰

江都宮樂歌

以下七言

揚州舊處可淹留臺榭高明復好遊風亭芳樹迎早夏
長臯麥隴送餘秋綠潭桂檝浮青雀果下金鞍躍紫駒
綠觴素蟻流霞飲長袖清歌樂戲州

泛龍舟

唐書樂志曰泛龍舟

隋煬帝江都宮作

舳艤千里泛歸舟言旋舊鎮下揚州借問揚州在何處

淮南江北海西頭六轡聊停御百丈暫罷開山歌棹謳
詎似江東掌間地獨自稱言鑑裏遊

四時白絳歌二首

東宮春

洛陽城邊朝日暉天淵池前春燕歸含露桃花開未飛
臨風楊柳自依依小苑花紅洛水綠清歌宛轉繁絃促
長袖逶迤動珠玉千年萬歲陽春曲

江都夏

黃梅雨細麥秋輕
楓樹蕭蕭江水平
飛樓綺觀軒若驚
花簾羅幃當夜清
菱潭落日雙鳧舫
綠水紅妝兩搖樣
還似扶桑碧海上

誰一作詎

肯空歌採蓮唱

紀遼東二首

襍言

隋書曰大業八年煬帝伐高麗度遼水大戰於東岸擊賊破之進圍遼東

遼東海北剪長鯨
風雲萬里清方當
銷鋒散馬牛旋師
宴鎬京前歌後舞
振軍威飲至解戎衣
判不徒行萬里去
空道五原歸

秉旄仗節定遼東，俘馘變夷風。清歌凱捷九都水，歸宴
雒陽宮。策功行賞不淹留，全軍藉智謀。詎似南宮複，道
上先封雍齒侯。

詩

冬至乾陽殿受朝

北陸玄冬盛，南宮漏長端。拱朝萬國守，文繼百王至。
德慤日用治，道愧時康新。邑建嵩岳雙闕臨，洛陽圭景
正。八表道路均，四方碧空霜華淨。朱庭皎日光，纓珮既

濟濟鐘鼓何鍾鍾文戟翊高殿采眊分脩廊元首乏明哲股肱貴惟良舟楫行有寄庶此王化昌

雲中受突厥主朝宴席賦

鹿塞鴻旗駐龍庭翠輦回氈惟望風舉穹廬向日開呼韓頓頰至屠耆接踵來索瓣擎羶肉韋羨獻酒杯如何漢天子空上單于臺

宴東堂

雨罷春光潤日落暝霞暉海榴舒欲盡山櫻開未飛清

音出歌扇浮香飄一作舞衣翠帳全臨戶金屏半隱扉
風花意無極芳樹曉禽歸

賜史祥

北史曰煬帝即位漢王作亂遣其將綦母良自釜口徇黎陽塞白馬津余公理自太行下河內帝以祥為行軍總管軍于河陰公理屯兵河陽城內以備祥祥簡精銳于下流潛度擊公理大破之東趣黎陽綦母良棄軍走其衆大潰進位上大將軍轉太僕卿帝賜祥詩

伯叟朝繼重夏侯親遇深貴耳唯聞古賤目詎知今早
慟勁草質久有背淮心掃逆黎山外振旅河之陰功已

書王府留情太僕箴

賜牛弘

北史曰煬帝在東宮數有詩書遺弘弘亦有
答及嗣位賜弘詩云云其同被賜詩者至於
文辭贊揚無如弘美

晉家山吏部魏代盧尚書莫言先哲異奇才並佐予學
行敦時俗道素乃冲虛納言雲閣上禮儀皇運初彝倫
欣有序垂拱事端居

賜諸葛穎

隋書本傳曰煬帝即位遷穎著作郎
甚見親待帝嘗賜穎詩其卒章曰

參翰長洲苑侍講肅成門名理窮研覈英華恣討論實
錄資平允傳芳尊後昆

早渡淮

平淮既淼淼曉霧復霏霏淮甸未分色泱漭共晨暉晴
霞轉孤嶼錦帆出長圻潮魚時躍浪沙禽鳴欲飛會待
高秋晚愁因逝水歸

臨渭源

西征乃屆此山路亦悠悠地幹紀靈異同穴吐洪流濫觴何足擬浮槎難可儔驚波鳴澗石澄岸瀉巖樓滔滔下狹縣森森肆神州長林肅白獸雲徑想青牛風歸花葉散日舉烟霧收直為求人隱非窮轍迹遊

還京師

東都禮儀舉西京冠蓋歸是月春之季花柳相依依雲蹕清馳道雕輦御晨暉嘹亮銃笳奏歲蕤旌旆飛後乘趨文雅前驅厲武威

捨舟登陸示慧日道場玉清玄壇德衆

天淨宿雲卷日舉長川旦颺灑林花落逶迤風柳散孤鶴近追羣啼鶯遠相喚蓮舟水處盡畫輪途始半江涯各自遙東西竝興歎已熏禪慧力復藉金丹悍有異三川遊曾非四門觀於焉履玅道超然登彼岸

謁方山靈巖寺

梵宮既隱隱靈岫亦沈沈平郊送晚日高峰落遠陰迴旛飛曙嶺疎鐘響晝林蟬鳴秋氣近泉吐石溪深抗迹

禪枝地發念菩提心

月夜觀星

團團素月淨
翛翛夕景清
谷泉驚暗石
松風動夜聲
披衣出荆戶
躡履步山楹
欣覩明堂亮
喜見泰階平
觜參猶可識
牛女尚分明
更移斗柄轉
夜久天河橫
徘徊不能寐
參差幾種情

季秋觀海

孟軻叙遊聖
枚乘說渝疾
逖聽乃前聞
臨深驗茲日
浮

天迴無岸含靈回非一委輸百谷歸朝宗萬川溢分城
空一作碧霧晴連洲彩雲密欣同夫子觀深愧玄虛筆

望海

碧海雖欣矚金臺空有聞遠水翻如岸遙山倒似雲斷
濤還共合連浪或時分馴鷗舊可狎卉木足為羣方知
小姑射誰復語臨汾

詠鷹

遷朔欲之衡忽投蔚羅裏既以羈華絆仍持獻君子青

駁固絕儔素羽誠難擬深目表茲稱闊臆斯為美驚獸
不及奔猜禽無暇起雖蒙講上榮無復凌雲志

獻歲讌宮臣

三元建上京六佾宴吳城朱庭容衛肅青天春氣明朝
光動劒絲長階分珮聲酒闌鐘磬息欣觀禮樂成

正月十五日于通衢建燈夜升南樓

法輪天上轉梵語天上来燈樹千光照花燄七枝開月
影凝流水春風含夜梅旛動黃金地鐘發琉璃臺

晚春

洛陽春稍晚四望滿春暉楊葉行將暗桃花落未稀
窺簷燕爭入穿林鳥亂飛唯當關塞者溽露方霑衣

悲秋

故年秋始去今年秋復來露濃山氣冷風急蟬聲哀鳥
擊初移樹魚寒欲隱苔斷霧時通日殘雲尚作雷

冬夜

不覺歲將盡已復入長安月影含冰凍風聲淒夜寒江

海波濤壯嶃潼坂險難無因寄飛翼徒欲動和鑾

夏日臨江

夏潭蔭脩竹高岸坐長楓日落滄江靜雲散遠山空鶩
飛林外白蓮開水上紅逍遙有餘興悵望情不終

北鄉古松樹

古松惟一樹森竦詎成林獨留塵尾影猶橫偃蓋陰雲
來聚雲色風度雜風音孤生小庭裏尚表歲寒心

賜守宮女

隋遺錄曰帝將幸江都東都宮女半不隨駕
泣留帝言遼東小國不足煩大駕願擇將征
之帝意不回因戲飛帛

題二十字賜守宮女

我夢江都好征遼亦偶然但存顏色在離別只今作拾遺
經

年

持櫂篇賜吳絳仙

帝幸江都至汴帝御龍舟蕭妃乘鳳舸每舟擇妙麗女子千人執雕板鏤金櫂號殿脚女中吳
絳仙者柔麗不與羣輩齒因有寵於帝帝每倚簾視絳仙移時不去因吟持櫂篇賜之

舊曲歌桃葉新妝艷落梅將身倚輕櫂知是渡江來

贈張麗華

帝昏湎往往為妖祟所惑嘗遊吳公宅雞臺
與陳後主相遇後主侍女數十許中一人迴
美帝屢目之後主云此即麗華也帝與後主
復詩十數篇麗華求帝一章帝操觚麗華捧
侍頽然

不憚

見面無多事聞名爾許時坐來生百媚實個好相知或此

偶筆

憶韓俊娥二首

帝在廣陵侍兒韓俊娥尤得帝意蕭妃誣罪
去之帝不能止暇日登迷樓憶之題東南二柱

點點愁侵骨綿綿病欲成須知潘岳鬢強半為多情
不信長相憶絲從鬢裏生閒來倚樓立相望幾含情

幸江都作

隋書五行志曰煬帝自京師如東都至長樂宮飲酒大醉因賦五言詩其卒章曰徒有歸飛心無復因風力令美人再三吟咏帝泣下霑襟侍御者莫不歎歎帝因幸江都復作五言詩云云帝以三月被弑即遭春之應也是年盜賊蜂起道路隔絕帝遂無還心復夢二豎子歌曰去亦死住亦死未若乘船渡江水由是築宮丹陽將居焉功未就而被弑

求歸不得去真成遭個春鳥聲爭勸酒梅花笑殺人

朝羅羅

以下
七言

帝常醉遊諸宮偶戲宮婢羅羅者
羅羅畏蕭妃不敢迎帝帝嘲之

個人無賴是橫波黛染隆顱簇小蛾幸好留儂伴成夢
不留儂住意如何

鳳船歌

廣五行志曰隋煬帝三月三日

江上作鳳船歌乃唐興之兆

三月三日向江頭正見鯉魚波上游意欲垂鉤往撈取
恐是蛟龍還復休

迷樓歌

帝再幸江都有迷樓宮人夜歌帝披衣起聽
召問之云孰使汝歌也女自為之耶宮女曰
臣有弟在民間曰道途兒童多唱此帝
默然久之曰天啟之也因索酒自歌

宮木陰濃燕子飛興衰自古漫成悲他日迷樓更好景
宮中吐艷變紅輝

效劉孝綽憶詩二首

以下雜言

憶睡時待來剛不來卸妝仍索伴解珮更相催博山恩
結夢沈水未成灰

憶起時投籤初報曉被匿香薰殘枕隱金釵裏笑動上
林中除却司晨鳥

望江南八闋

海山記曰煬帝闢地周二百里為西苑內為
十六院聚巧石為山鑿池為湖海又鑿北海
周迴四十里中有三山效蓬萊方丈瀛洲上
皆臺榭迴廊水深數丈開溝通五湖北海盡
通行龍鳳舸帝多泛東湖固

製湖上曲望江南八闋云

湖上月偏照列仙家水浸寒光鋪枕簟浪攬晴影走金
蛇偏稱泛靈槎光景好輕彩望中斜清露冷侵銀兔

影西風吹落桂枝花開宴思無涯

湖上柳烟裏不勝垂宿霧洗開明媚眼東風搖弄好腰肢
烟雨更相宜環曲岸陰覆畫橋低線拂行人春晚後絮飛晴雪暖風時幽意更依依

湖上雪風急墮還多輕片有時敲竹戶素華無韻入澄波望外玉相磨湖水遠天地色同和仰面莫思梁苑賦朝來且聽玉人歌不醉擬如何

湖上草碧翠浪通津脩帶不為歌舞緩濃鋪堪作醉人

茵無意覩香衾 晴霽後顏色一般新遊子不歸生滿
地佳人遠意寄青春留詠卒難伸

湖上花天水浸靈芽淺葢水邊勻玉粉濃苞天外剪明
霞只在列仙家 開爛熳插鬢若相遮水殿春寒幽冷
艷玉軒晴照暖添華清賞思何賒

湖上女精選正輕盈猶恨乍離金殿侶相將盡是采蓮
人清唱謾頻頻 軒內好嬉戲下龍津玉管朱絃聞盡
夜踏青闌草事青春玉輦從羣真

湖上酒終日助清歡檀板輕聲銀甲緩醅浮香未玉俎
寒醉眼暗相看春殿晚仙艷奉杯盤湖上風光真可
愛醉鄉天地就中寬帝王正清安

湖上水流遶禁園中映日暖搖清翠動落花香暖衆紋
紅蘋末起清風閒縱目魚躍小蓮東泛泛輕搖蘭棹
穩沈沈寒影上仙宮遠意更重重



總校官庶吉士臣侍朝

校對官中書臣張 壽

謄錄監生臣王 朝寧